

*Handwritten: Haler*

# Ain Gründtlicher bericht:

vom Christlichen Tauff / vnd seyner Krafft /  
vnd notdürfftigkeit / Auß den ersten war-  
hatten / sampt der hayligen Euangelia-  
schen geschriffte / bewert / darinn alle  
irthumb vnd myßbreuch (bisher  
erwachssen) verworffen wer-  
den / vnnnd die schlecht  
gründlich warhait  
anzaygt / ge-  
wyßlich.

Durch Johannem Landt-  
spurger / ain Armen diener Christi.

M. D. XXVI.

# Vendtbrieff zu den Christen

lichen frommen brüder / die diß lesen.

## Allen Christlichen gots

föchtigen brüdern / vnnnd liebhabern / der rechten Euangelischen warhait / Entbesit Johannes Landtspurger ain armer vnwürdiger knecht Christi (vnd diener aller güttes willigen des Götlichen worts zu höiern) Gnad vñ frid / von Gott vnserm gütigen vatter / vnd vnserm herren Jesu Christo Amen.

Außerwölter brüder vnd liebhaber Ihesu Christi / Ir wißent / das yetz etlich zeytelang manigerlay haltē / oder opinion vom Christlichen tauff gewesen seind / Das man zu vil auff menschliche dichtung gehalten / vnd vil vnnützer Cerimonie das ist / geprenge / oder höstigkeit (gleichsam got löblich / vñ dem Christlichen tauffzierlich) geacht / vnd als gut seyn beschribt hat / Das Got nit gewölt / noch also zu halten verordnet haben / auß der geschuift erkendt wirdt / vnd wie wol ettlich darvon geschriben haben / doch den myßbrauch noch nye bey der rechten wurzel ergryffen / darumb dan nichts gebessert / sonder all wider die Götlichen warhait / auß menschlichem gwalt erhalten worden seind. Der vrsach halb / auß erbarmung vber die irigen gewissen / hab ich disen Tractat gemacht / Got zu lob / vnd vnserm herren Jesu Christo zu preys sampt seynem wort / zu bestettigung / des glaubens / liebe / vñ hoffnung / dise gemelte irrthumb zu für kōmen / vnd die myßbrietich abzustellen. Bitt euch alle sampt / in der liebe Ihesu Christi / Ir wölt nit ansehen / mein ainseltigkeit / sonder ewer innerlich gesicht / das ist / ewer verstendnuß / zu der lauterer claren warhait / vnd zu Götlichem wort / auffhebe (weyl ich nit das mein süch / sonder das Christi ist / vñ der seelen gewin) so werdent jr mit der hilff Christi / trost / frewd / vnd den rechten grundt finden / Gott lobend in ewigkeit Amen.



# **I**n dem namen der vn-

getaylten/ vñ allerhöchsten dreyainigkeit / heb ich an dises schreiben/ von dem tauß vnseren herren Jesu Christi/ vñ von seiner krafft vnd frucht/ vñ von der aller besten auff-  
sazunge/ durch die ewige vngemeßne / vnd vnergründeliche weyßhait (wölliche ich also anruff / mit beyzüston) wider manigerlay irthumb/ bißher/ auß menschlicher fürwitz vnd freuelentstandē/ on grund der hailigē geschüfft/ on wölliche der Christlich glaub eyttel/ vnd nichts denn ain verfiertlicher oder betruglicher trawm wer.

Allmechtiger ewiger/ gütiger/ vnentliche weyßhait/ warer vnd barmherziger Got/ erleucht mich dein armen vnnützen diener/ vnd alle Christliche menschen/ laß vns nitt irren/ als die schäflen/ die kein hyrten haben/ leere vns dein stym hören vnd deinen willen volbringen / das wir allen vnsern trost vñ züuersicht/ in dich ainigen ewigen Got/ vnd in deinen geliebten sun/ vnseren herren Jesum Christu setzen/ wölcher mit dir vnd dem hailigen gayst/ lebt/ vnd regiert in ewigkeit Amen.

Gott sahe alle ding/ die er gemacht hett/ vñ sy waren vber auß güt/ Genesi. 1. vnd Luce. 18. Er hats alles wolgemacht/ dan sy waren auß der güthait/ die Got selber ist. Nun ist güt hait ain sollichs ding/ durch wölche alle ding güt seind/ vnd güts wircken/ oder thun mügen. Folgt auß dem/ das nichts güt ist/ vnd güttes wircken mag/ von/ vnd auß jm selbs/ vnd also verstat man die wort Christi/ da er sprach/ Was hayssst du mich güt/ es ist niemandes güt/ den allain Got/ verstand von jm selbs wesenlich/ weyl er die güthait (die alle ding güt macht) selber ist/ sunst weren die wort Christi / vñnd die am buch der schöpffung/ am Ersten (Sy waren vber auß güt) widerainander.

So nun nyemandt güthait von jm selber hat/ sonder von Gott allain/ Folgt zü andern/ Das kein mensch/ oder ander Creatur/ etwas güts thun mag/ on Got/ das ist/ on gotes hilf vnd wölcher sich des vnderstat/ vñ laßt sich duncken/ er wöl

Genesi. 1.  
Mach. 18.

Die. 1. volg

Die 2. volg

auff jm selber etwas gütts/ das ist/ Gott wolgefelligs thun  
(weyl er kain güthait von jm selber hat) der verlengnet Got-  
tes güthait/ auff wölcher allain alle ding güt seind/ vñ gütts  
wirken mügen.

Die 3. volg

So dann der Götlich/ewig/ vnd vnentlich/vngemessen/  
weyß will gottes/etwas von jm selber thut/oder gebet/ ord-  
net/oder frey seyn will. Ist vnmüglich/ das es die menschen  
sazungen/besser machen/oder mit irem züthün zieren müge  
Weyter weñ Gots wort geoffenbart hat/ in der hailigen ge-  
schrifft begriffen. Volgt zum dritten/ weñ man etwas meer  
verbeit dan got verboten hat/so ist götelichs wort schon ver-  
leugnet/ ja zur lügen gemacht/ vñ sach verfaß alles/ was Got  
nit verboten hatt/ das ist frey züthün/oder zü lassen/ vnd ist  
gleych so vil/ wa Gott etwas freyläßt/ vnd nit verbeit/ als  
het er es darzū gethon oder gesprochē/ das gebet ich/ das es  
frey soll seyn/ Dann der gebietend will Gottes/ vnd der frey-  
machend will/ seind nit zwen willen/ sonder ain ayniger/ ewi-  
ger/ vnd vnwandelbarer will/ güt/ ja die güthait selber/ vnd  
weyß/ ja auch die weyßhait selber/ vnd gwaltig/ ja auch der  
gwalt/ vnd die warhait selber. So nun Pāpst oder Bischöf  
vnd ander der gleychen/etwas verbietē/ das durch Got frey  
gelassen ist/ was ist es anders/ dan sagen/ Gottes will sey nit  
güt/ noch gerecht/ noch weyß genüg/ sonder jr menschlicher  
ja jr verkerter will/ sey besser/ gerechter/ vnd weyßer/ vnd der  
gleychen. Wie möcht man ain grössere verachtūg/ vnd gots  
lesterung erdencken.

Die 4. volg

Auff dem volgt zum vierdten/ Alles was Christus der sun-  
des lebendigen Gottes/ die vnentliche ewige weyßhait selber  
geleert vnd auffgesetzt hat/ vnd wie/ oder in wölcherlay wey-  
se/ Also güt/ volkōmen/ vnd weyßlich geziert sein/ nutz vñ ge-  
recht/ das nit möglich ist/ etwas (zū meeren die güthait vnd  
zierlichkeit) hinzū zethün/ Ist auch kain gwalt (der nit ewig  
vnd vnentlich ist) zū thon erlaubt. Vnd wölcher das vnder-  
stadt/ er sey Pāpst oder Bischoff/ oder noch ains höhern ge-  
walts/ der schmecht Got vnd Jesum Christū/ am aller höch



sten/auß obgemelter vrsach/ den er strafft Christi/ mit dem  
werck/ als ob sein leer vnd auffsetzung/ mit gnüg weyßlich/ ob  
nit recht geordnet wer/ vnd mache also ain spottvogel/ oder  
ain gespöt/ auß vnserem schöpffer vñ erlöset/ eben gleych als  
so der layme spiech zum haffner/ vnd das werck zu seym ma  
cher/ warumb machstu mich also 1c. Esaie. 29.

Nun was dem aller besten/ vnd aller weysesten wille Goe  
tes wolgefelle/ das muß von nott wegen/ das aller beste vnd  
weysest sein. Wölcher den auß menschen bedunckē/ es anders  
machen/ oder ettwas darzu/ oder daruon thūn wolt/ der wi  
derstrebt vnd schmecht den willen Gottes. Aber derselb wirt  
vns offenbar/ auß der hailigen geschrifft/ Darumb wer nit  
auß der geschrifft/ oder wider die hailig geschrifft handelt/  
ettwas hinzu oder daruon thut/ der vbertryt das gebott/ des  
Götlichen willens/ Deuter. 4. vnd. 12.

Argumen  
tum.

So nun Christus der sun des lebendigen Gottes (wölcher  
den willen seyns vatters/ am höchsten zu volbringen/ vnd zu  
erfüllen von hymel herab kommen ist/ vnd die andern/ disem  
willen nach zūvolgen/ gnügsam vnderwysen vnd geleert hat  
vnd auch die ewige weyßhait selber ist/ In wölchem der vat  
ter ain wolgefalle hat) etwas von jm selber auffsetzt/ in Got  
wolgefelliger weyß vnd gestalt (als er wol mayßt vnd thut)  
wie ain grosser gotslesterer wer den/ wölcher das anders  
machen wolt/ hinzu oder daruon thut/ auß der menschen sag  
ungen/ mit wölchen Gott vergeblich geert wirdt. Esaie. 29.  
vnd Mathei. 15.

Joannis. 1  
Math. 17.

Esaie. 29.  
Math. 15.

Weyl dan Christus der son des lebendigen Gottes/ die vn  
entlich vnd ewige weyßhait/ den Taufß vnd sein Testament/  
selber auffgesetzt/ vnd inen form vnd weyß (wie sy zu halten  
seyn) geben hat/ jm nach zūvolgen bevolhen/ Wie dann seyn  
vatter geredt hatt/ Mathei. 17. Dis ist mein geliebter sun/ in  
dem ich ain wolgefallen hab/ in solt jr hören. Folgt zu fünff  
ten/ Das die verkerer/ der weyß vnd form/ auß irem aygen  
hyrn vnd güt beduncken/ ire Cerimonia/ oder (als sy sagen)  
solennitates/ das ist/ gebiengt hinzu thūnde/ nit war Christen

Math. 17.  
Die 5. volg

noch von der Christlichen Kirchen sein/genendet werden solle/  
weyl sy Christo dem haupt der gemain/nit nach volgen/vnd  
sein leer vnd auffsetzung nit halten/die schmechen in vñ seyn  
leer/vnd Sacrament/ als sam sy vngenügsam verordnet vñ  
geziert weren 2c. Vom Testament hab ich vor zwey büchlein  
geschriben/ Ains im 24. das ander im 25. jar. Ober ain frag  
Doctor Steffans Castenbaur. Nun wird ich zwingen von  
meiner gwissen/Got zu lob/vnd mangelay irthumb auß zu  
reytten/auch vom tauff zu schreybē. Vnd erstlich wollen wir  
sehen/die Euangelisch geschafft zu beweyssen/die auffsetz-  
ung des tauffs von Christo.

Matth. 3. Johannes der tauffer/sprach zu den Phariseern/vnd Sa-  
duceern (die zu im kamen/das sy von im getaufft wurden)  
Ich tauffe euch im wasser/zū der besserung/des lebēs/vñ der  
wölcher nach mir zukünfftig ist/wölches ich nit würdig bin  
das ich trag seyn schüch/Er wirdt euch tauffen im hailigen  
gayst/vnd im feuer/wölches wurffschauffel/in seiner hand  
vnd er wirdt widerumb raynigen seynen thennen/vnd wirdt  
versamlen seinen waytzen in die schewren/aber die spietwē  
wirdt er verbrennen mit ewigem feuer.

Zū der zeyt kam Jesus von Galilea/an den Jordan/zū Jo-  
hanne/das er sich tauffen ließ. Aber Johannes wöret im vñ  
sprach/Ich bedarff wol/das ich von dir getaufft werd/vnd  
du kumbst zu mir/Jesus aber antwort vnd sprach/Las yetz  
also seyn/Also gebürt es vnns/alle gerechtigkeit zu erfüllen/  
Da ließ ers im zu/vnd da Jesus getaufft war/styg er herauf  
auß dem wasser/vnd syhe/da wurden vber im auffgethon/  
die hymel/vnd Johannes sahe den gayst Gottes/ gleych als  
ain tawben herab steygen/vnd vber in künmen/vnd syhe/ain  
stym von hymel herab sprach/Diñ ist mein geliebter sun/in  
wölchē ich ain wolgefallen hab.

Johan. 1. Vnd Johan. 1. Des andern tags sicht Johannes Ihesum  
zu im kōmen vñ spricht/Sehend das lamb Gottes/wölches  
der welt sünd auff sich nympt. Diser ist von dem ich euch ge-  
sagt hab/Nach mir kumpt ain man/wölcher vor mir gewes



sen ist/dann er was er den ich/ vnd ich kandt in nicht/sonder  
auff das er offenbar wurd/in Israhel/Darumb bin ich kom  
men zu tauffen mit wasser.

Vnd Johannes zeügte vñ sprach/ Ich sahe das der gayst  
hernyder styg von himel/wie ain tauw/ vnd blib auff jm/vñ  
ich kante in nit. Aber der mich sandte zu tauffen mit wasser  
der selb sprach zu mir/auf wöliche du sehen wirst/ den gayst  
nyder steygen/vnd bleyben/der selb ist/ der mit dem hailige  
gayst tauffet/vnd ich sahe es/vnd zeügte/das diser ist Gots  
tes sun.

Auch Johannis. 3. sprach Jesus zu Nicodemo/Warlich/  
warlich sag ich dir/Es sey dan/das yemandt geboren werde  
auß dem wasser vnd dem hailigen gayst/ der kan nitt in das  
reych Gottes kómen. Was vom flaysch geboren wirt/das ist  
flaysch/vnd was vom gayst geboren wirt/das ist gayst/ laß  
dich nit wundern/das ich dir gesagt hab / Ir müßent von  
newem geboren werden. Der wind blöset wa er will/ vnd du  
hörest sein hauchen wol / Aber du wayßt nitt von wannen er  
kómpet/vnd wa hin er fareet / Also ist ain yegklicher/ der auß  
dem gayst geboren ist oder wírdet.

Johan. 3.

Darnach kam Jesus vñ sein Junger/in das Jüdisch land  
vnd hett da selbst seyn wouung mit in/ vnd tauffte. Johan  
nes aber taufft auch/noch zu Ennon/nahet bey Salim/dan  
es war vil wassers da selbs/vnd sy kamen dahyn/vnd ließen  
sich tauffen/dan Joānes was noch nit ins gefencnus gelegt.

Da erhüb sich ain frag vnder den jungern Johānis/sampt  
den Juden/ vber die raynigung/vñ kamen zu Johannē/vnd  
sprachen zu jm/Maister/der bey dir war/yhenseyt dem Jor  
dan/von dem du zeügest/ Syhe der tauffet/vnnd yederman  
kómpet zu jm. Johannes antwurt/vnnd sprach/ Ain mensch  
kan nichts nemen/es werde jm dan geben von hymel/ir selbs  
seyt mein zeügen/das ich gesagt hab / Ich sey nitt Christus/  
sonder von jm her gesandt/wer die brant hat/der ist der bren  
gam/ Der freünd aber des brientgams/steet vnd höret jm zu/  
vñ frewet sich hoch/vber des brientgams stym/die selb meina

Mathei.  
Johan. 13.

freud ist nu erfüllet/ Er muß wachsen/ aber ich muß abnemen  
Der von oben herab kumbt/ ist vber alle/ Wer von der erde  
ist/ der ist von der erden/ vnd redt von der erden. Der vom hy  
mel kumpt/ der ist vber alle/ vnd zeugt was er gesehen/ vñ ge  
hört hatt/ vnd sein zeugnuß nympt nyemandt auff/ wer es  
aber auffnympt/ der versigelts/ das got warhafftig sey/ dan  
wöllichen Gott gesandt hatt/ der redet Gottes wort/ dann  
Gott gybt den gayst nicht nach der maß. Der vatter hat den  
sun lieb/ vnd hat jm alles in seyn hand gebē/ Wer an den sun  
glaubt/ der hatt das ewig leben/ Wer dem sun nicht glaubt/  
derewirt das lebē nit sehen/ sonder der zorn gots bleybt ob jm  
Volgt im vierdtē Capitel/ Da nun Jesus innen ward/ das  
für die Phariseer kōmen war/ wie Jesus mee Junger machet  
(vnd tauffet) den Johānes (wie wol Jesus selber nit tauffet  
sonder seyne Junger) verließ er das land Judeam/ vnd zoch  
wider in Gallileam 2c.

Vnd Math. am letzten/ ist geschriben/ aber die aylß Jun  
ger/ giengen in Galileam/ auff ainen berg/ da hin sy Ihesu  
beschayden hett/ vnd da sy in sahen/ fielen sy für in nyder/ Et  
lich aber zweyffelten/ vnd Ihesus trat zū in/ vnd redt mit in  
vnd sprach/ Mir ist geben aller gewalt/ in hymel vnd erden/  
Darab geet hin vnd leere alle völder/ vnd taufft sy in dem  
namen des vatters/ vnd des suns/ vnd des hailigen gaysts/  
vnd leere sy halten/ alles was ich euch bevolhen hab/ vnd  
syhe/ ich bin bey euch alltag/ biß ans end der welt.

Auch Marci am letzten/ sprach Jesus vor seiner Auffart/  
Geet hyn in alle welt/ vnd Prediget das Euangelion/ allen  
Creaturen/ wer da glaubt vnd taufft wirt/ der wirt selig wor  
den/ wer aber nit glaubt/ der wirdt verdampft werden 2c.

Auß disen claren Euangelischen sprüchen / Ist offenbar/  
der will des almechtigen Gots/ vnd Christi vñsers herun vñ  
erlösers/ dem Johannes zeugnuß geben hatt/ das er der sun  
Gottes sey/ vnd tauffen würd im hayligen gayst. Ist auch of  
fenbar/ das zū dem Christlichen tauff/ nicht nott ist/ wann al  
lein lautter Elementisch wasser/ wie zū tauff Johannis (der



materi halb) der von hymel kōmen ist/ vnnnd die wort Christi  
Gottes/ als ain form (wölche Christus auffgesetzt hat/ Ma-  
thei am letzten) zū betrefeffigen/ vnd zū bestetigen seinē tauff  
Im namen des vaters/ vnd des suns/ vnd des hailigē gaysts  
zū ain zaychen/ das die krafft des tauffs/ im wasser nitt ist/  
sonder in der wirckūg gottes/ durchs wort des lebēs. Ephe. 5

Ephe. 5.

Dergleychen auch wirdt das wasser für sich selbs/ mit der  
tauff genēnt/ besonder/ die wāschung/ im/ oder mit dem was-  
ser/ sampt den gesprochenen wortten/ die Christus auffgesetzt  
hatt/ Also das ain yerlichs Elementisch wasser/ geschickt ist  
zum brauch des tauffs. Darūb spricht Ambrosius. Das Chri-  
stus in seiner tauffung (da er von Johanne getauft ist wor-  
den) alle wasser gerayniget hab (inen krafft gebende der wi-  
dergeberung) Das ist nit zū verstōn/ das krafft oder ettwas  
gnad/ im wasser/ oder in allen wasseren sey/ sonder/ das alle  
Elementische wasser/ flyessend oder auß den brunnen/ mūgē  
gebraucht werden/ als geschickt/ zum tauff/ oder zur wider-  
geberung im hailigen gayst/ durchs auffgesetzt wort vō Chri-  
sto. Also dz/ das wasser sampt dem wāschen/ durch die wort  
(in der wāschung gesprochen) gnūgsam geschickt/ oder ge-  
hailiget werde/ zū bedenten die wāschung der seel vō den sūn-  
den/ durch den hailigen gayst/ ober mer (wie die wort laute)  
durch die hailige drey ainigkait.

Also hat Gott alle wasser gefreyet/ vnd wōllen yederman  
frey sein/ zū der widergeberūg/ vnd seind auch (durch die ord-  
nung Gottes/ vnd Christi) also gūtt darzū/ das nit mūglich  
ist/ allen Englen/ vnd menschen/ mit aller irer weyßhait/ sy  
besser zū machē/ wēn er hats alles wol vñ gūtt gemache Lu. 18

Luce. 18.

Auß dem ist offenbar (nach laute der ersten/ andern/ vnd  
der dritten volg) der groß freuel/ vnd mūtwill/ deren/ die ain  
besonder wasser (durch stinckende hend der menschen geseg-  
net/ als ob es besser solte sein dann annder wasser) zū tauffen  
brauchen/ Vnd sy schliessend es ein/ vnd nennen es den tauff  
vnd nemen sich an/ zwoy im jar (am Oster vñ pfingst abēt)  
den selben tauff grūssen erneuern/ oder von neuem segnen.

Damit sy des arm ainfeltig volck verführen/vnd in iren geyg  
bringen/wider den willen Gottes (wie yetz bewert ist) vnd  
das ist nit gnüg/ sy thünd auch darzü öle/den Crysem/vñ an  
der gespenst/wider die auffsetzung Christi.

Vnd also widerstond sy nit allain dem freymachendē wil  
len Gottes/sonder auch der ordnung/der ewigen vnendelichen  
weyßheit/die Christus der sun des lebendigē Gots selber ist/  
gleich als ob sy auß irem gütdunckē/der tauffung ain eer an  
legen wollten/mit iren erdichten deuttungen/des Crysmas/  
vñ anderer/weyhung des wassers (das man darauß behaltē  
soll) mit sampt zu glegten andern stücken/wölche Christus  
nye zu tauff gebraucht werden gewölt hat (wie er auch selbs  
nit mit solcher solemnitet getaufft worden ist) sonder mer/er  
selbs/ist die recht warezierd des tauffs/vnd krafft geber/der  
geschicklichkeit/allen Elementischen wassern (auß dem wil  
len seins vaters) zu volköner bedeutnuß/der inneren wäschung  
der seelen/durch die krafft Christi/vnd des worts Gottes/der  
eusserlichen wäschung zugefügt/als ain rechte form/in wöl  
cher die hailigung/der wasser stadt/im puncten/so die wä  
schung eusserlich geschicht/vnd ist gar kain nott/das man  
vor ain segē darüber sprech/das gnad/oder ain sonderer kras  
ins wasser kum. Der es nit entpfenglich ist (wie obē gemele)  
vnd diß haltē alle Doctores/Die vber den mayster von synne  
schreyben/im vierden buch/Vnd wa sy anders sagtē/so red  
ten sy on geschrifft/des halben jnen nit zu glauben were.

Die. 1. volg

Auß wölchem zum Ersten volgt/die groß plindheit/dz  
man den tauff mit so grosser müe/vnd pomp/segnet/vnd vñ  
der andern/den Osterstock/drey mal in dz tauf wasser senckt  
mit disen worten (descendat in hac plenitudine fontis virtus  
spūs scī) Die kraft des hailigen gaysts/steyg ab in die tyeffe  
dieses brunnens/Weyl doch das Elementisch wasser/kayner  
gnad oder vbernaturlichen krafft/von jm selber (das ist auß  
seyner aygenschafft) entpfenglich ist (die seel betreffende)  
sonder allain/auß auffsetzung Christi/bedeut es mit der eus  
serlichen wäschung/die innerlichen wäschung der seel/wölche



auff krafft der wort Gottes/ vnd auff dem verdienste des ley-  
dens Christi geschicht Epheſi. 5. wie ich melden werd/ ſolch  
red vom tauſſ/ vnd namen des tauſſs.

So nun ſolche Cerimonie (wie bewert iſt) nichtonun ſeind  
vnd nun menschen dichtungge/ Volgt zu andern/ Das der al-  
mechtig ewig Gott (der alle ding vmb ſein ſelbs willen ge-  
macht hat) kein gefallen darinnen hatt/ weyl ſy nit auß leere  
vnd ordnung ſeines geliebten ſuns (in wölchem er ain wolge-  
fallen hat) können/ oder entſpringen. Darumb haſſet ſy Got/  
vnd wirdt vergeblich damit geeret. Eſa. 29. Math. 15. Will  
auch nit nach menschen gebotten/ vnd gütt duncen/ gelobt  
oder gepreyſt werden/ ſonder nach ſeinem gebott/ vnd willē  
(wölcher nit irren mag) geeret werden/ Auch das mynſt nit  
darzu laſſen thun/ Am fünfften büch Moſi/ am 4. 12. vñ 13.

Weyl nun Chriſtus können iſt/ nit ſeinen willen/ ſonder des  
vatters willen/ zu ſuchen vnd zu thun/ Johan. 5. vnd 6. Vnd  
nyemane zunt vater können mag/ dan durch Chriſtū. Joā. 10.  
Vnd auch niemant zu Chriſto/ der vater zieh in dan Joan. 6.  
Vnd ſein leere iſt nitt ſeyn/ ſonder des vatters/ der in geſandt  
hat/ Joā. 7. Vnd er iſt das liecht der wele/ wer im nach geet  
der wandelt nit in der finſternuß (Joan. 8.) ſonder hatt das  
licht des lebens. Volgt zu dritten/ Das gott dem hymliſchen  
vatter/ nichts wolgeſellt/ das Chriſtus nit geleert oder gebot-  
ten hatt/ vnd wölcher im nit volgt/ der bleybt in der finſter-  
nuß. Vnd weyl er durch Chriſtum/ die rechte thür nit hinein  
geet/ wirdt er von Chriſto ain dieb/ vnd ain möder/ nitt vn-  
billich genendt/ nit würdig ſeynes Keychs.

Derhalben/ wölcher anders tauſſt/ oder ſeyne kinder/ mit  
verdachtem müt/ anders/ dan Chriſtus auffgeſetzt hat/ tauſ-  
ſen laſt/ vnd anders wen wie Chriſtus (ſampt ſein Apoſtel)  
ſelbs tauſſt worden iſt/ der preyſt Gott nit/ ſonder ſchmecht  
in/ am aller höchſten/ Sich oder ſeine kinder/ beſſer vnd edler  
achtend/ dann Chriſtū/ vnd alle ſeyne Junger / ſampt allen  
glaubigen/ der anfangenden gemayn/ oder aber er vermayne  
Chriſtum vnd alle ſeine nachfolger/ nitt gnüg weyß geſeſen

Roma. 8.

Titum. 3.

Colloſſ. 3.

Die 2. volg

Prover. 16.

Eſaie. 29.

Math. 15.

Deut. 4. 12

vnd 13.

Joan. 5. 6.

Johan. 10.

Johan. 6.

Johan. 7.

Johan. 8.

Die 3. volg

seyn/vnd Christus leere vnvolckömen / als nitt genügsam zur seligkeit. Pfeil der schand/vñ der grewlichen verachtung Gottes/ ja gleych als vil/sam er nitt Gott/ die ewig güthait/vnd ewige vnentliche weyßhait/für sich selber wer.

Sy müßen auch nit sagen/das der hailig gayst/ anders et was geoffenbart hab/dan Christus aufgesetzt/vnd sein Apostel vñ nachkömen/lange zeyt gebraucht habē / weyl der will Christi/vnd des vatters (den er zu thun von hymel gestygen ist) vnd der will des hailigen gaysts/sampt inen/ ain ainiger ewiger/gütter/onendlich weyser/gwaltiger/warhafftiger/vnwandelbarer will ist. Also das nit möglich ist / ain aynliche widerwertigkeit in dem willen Gottes erfunden werden. Mag auch nichts anderst wöllen/ den das er von ewigkeit/das ist/vor der zeyt/gewölt hat/ als alle leere vnd gebott/mit sampt anderer auffsetzung Christi seind / weyl er vor der zeyt verordnet ist/ Ephe. 1. vnd an vil orten der hailigen geschrifft anzeygt wirdt. Darumb wölcher anders sagt/den Christus/vnd sein Apostel geleert habē/ erfüle mit dem hailigen gayst/ der verlengnet gots/serzt zwitracht vnd boßhait/ in die obersten sachen/vnd ist würdig des fluchs Gal. 1. Wenn die höchst ainigkeit ist in Got/dreyen personē/wie Christus zeyt schier durch das ganz Euāgilion Johannis/ fürnemlich aber am 5. 6. 7. 8. vnd 14. 15. 16. vñ 17. capitlen. Nun spricht Christus Mathei. 12. Wer nit mit mir ist/der ist wider mich/vnd wölcher nit mit mir versamlet/der zerstreuet 2c.

Auß dem schleiß ich vnwidersprechlich/das alle die/wölliche vber die leere vnd auffsetzung Christi / zum tanff etwas thünd/ als ob es not/oder zierlicher/vñ ain eer Gottes sey/die selben seind wider Christū (wie der entchrist/od̄ widerchrist) vnd zerstreuet/ was Christus durch den tanf versamlen will weyl er selber sagt/wer nit mit mir/das ist/mit meynere leere ist/der ist wider mich 2c. Math. 12. So nun die leere Christi des vatters ist/vnd dergleychen sein will/ weyl Christus seyn geliebter sun ist/vnd will das er gehört werd. Folgt zu vierdten/ Das ain yeglicher/wölcher der leere Christi nitt volgt/

Joan. 5. 6.

Ephesi. 1.

Galat. 1.

Joā. 1. 6. 7

Math. 17.

Die 4 volg



Ist nie allain wider Christum/ sonder auch wider sein vatter  
vnd den hayligen gayst Johannis. 15. Wer mich hasset/ der  
hasset auch meynen vatter 2c. Johan. 15.

Das sy aber sagen / der hailig gayst hab sollichs geoffene  
bart zûthûn/ wie sy mit vmbgond. Das hat auß der hayligen  
geschriffte kein grund/ vñ ist wider die ersten warhaiten (wie  
yetz bewert ist) Ideo (vt dicit Hieronimus) eadem facilitate  
contemnitur/ qua probatur. Darumb weils auß der hailigen  
geschriffte kein grund hat/ wirts mit gleycher leuchtigkeit ver  
acht/ mit wölcher es bewert wirt. Wie wolletlich jren grunde  
setzen/ auff die wort Christi Johan. 16. Ich hab euch noch vil  
zû sagen/ aber jr kûndes yetz nicht tragen/ das ist/ begreyffen  
behalten/ oder verston 2c. So doch dise wort offentlich wider  
sy seind/ sampt etlichen Worten Johannis. 14. Derhalb laßt  
vns den text besehen.

Johan. 16.

Johannis am. 16. sagt Christus/ Ich hab euch noch vil zû  
sagen / Aber jr kûndes yetz nitt behalten/ wenn aber yhener/  
der gayst der warhait kômen wirt/ der wirt euch in alle war  
hait layten/ dan er wirdt nit von jm selbs reden/ sonder was  
er hören wirdt/ das wirdt er reden/ vnd was zû künfftig ist/  
wirdt er euch verkündigen/ der selb wirt mich preysen/ dann  
von dem meynen wirdt ers nemen / vñd euch verkündigen/  
Alles was der vatter hatt/ das ist mein/ darumb hab ich ge  
sagt/ er wirts von dem meinēnemen/ vnd euch verkündigen.

das ist am  
Pffingstag  
erfült wor  
den.

Hie ist clar/ das Christus erkendt hat die blödigkeit seyner  
Junger/ das sy/ auß betrübenus in seinē leyden/ nitt alle wort  
(wölche er jnen sagt) begreyffen mochten / oder behallten.  
Darumb verhayst er jnen den hailigen gayst/ zû senden (als  
den am Pffingstag geschehen ist) der sy in alle warhait layten  
vnd jnen zûkünfftige ding verkündigen wurd/ wölche sy dan  
gethon haben/ an dem obgemelten tag / So bald der hailig  
gayst gesandt ward/ Das sy die Propheten vnd andere ge  
schriffte/ von Christo/ verstünden/ vnd die vergessene wort/ vñ  
jm gehört/ predigten / Wie dan das buch der Apostel wirck  
ung/ klärlich außweyßt/ am. 2. cap. vnd darnach. Vnd habē

nuch erkende zůtünfftig ding/ wie Petrus/ Paulus/ vnd Jo-  
hannes/ in iren Epistlen beweysen. Aber solche offenbarun-  
gen haben sy inn schrifftten verlassen / Deshalb kein andere  
newer offenbarung nott gewesen ist / sunst hett er sy nitt alle  
warhait geleert/ not zum hayl.

Johan. 14

Diser verstand ist gleychförmig den wort Christi Joā. 14  
Liebet jr mich/ so haltet mein gebott/ vnd ich will den vatter  
bitten/ vnd er soll euch ainen andern tröster geben/ das er bey  
euch bleyb ewigklich/ den gayst der warhait/ wölche die welt  
niet kan entpfahen/ dann sy sieht in nitt/ vnd kennet in nitt/ jr  
aber kennet in/ dan er bleybt bey euch/ vnd wirdt in euch sein  
Ich will euch nit wayssen lassen/ Ich kum zů euch ic. Im text  
da hört man wol/ das der haylig gayst/ nit bleybt in der welt  
(wölche in nit kende) sonder in denen/ die das gebot vñ wort  
Christi hallten/ wölche er von der welt außervölte hatt/ vnd  
die welt hasset sy Johannis. 15.

Johan. 15

Johan. 14.

Darumb volgt bald hernach/ Wer mein gebot hat vñ helt  
sy/ der ist der mich liebet/ Wer mich aber liebet/ der wirt von  
meinem vatter geliebet/ vnd ich wird in lieben/ vnd mich in  
offenbare. Da fragt in Judas/ aber nit scariothes. Zeri was  
ists dann/ das du vns/ dich wilt offenbaren/ vnd nit der welt

Jhesus aber antwort vñ sprach zů jm/ Wer mich liebt der  
wirt mein wort halten/ vnd mein vatter wirdt in lieben/ vnd  
wir werden zů jm kōmen/ vnd wonung bey jm machen/ Wer  
aber mich nit liebt/ der helt mein wort nit/ vnd das wort das  
jr hört/ ist nit mein/ sonder des vaters der mich gesandt hat  
Sollichs hab ich euch gesagt/ weyl ich bey euch gewesen bin/  
Aber der tröster/ der hailig gayst/ wölchen mein vater senden  
wirt/ in meinē namen/ der selbig wirts euch alles leeren/ vnd  
euch erinnern/ alles das/ das ich euch gesagt hab.

Da/ main ich/ vermerckt man vnd sihet klarlich/ was der  
hailig gayst/ offenbart/ Nemlich die leere/ vnd wort Christi  
vnd wer die haltet/ der wirt geliebt vom vater/ vnd vom sun  
vnd der hailig gayst bleybt in jm ewigklich / vnd der vatter/  
vnd der sun kōmen zů jm / vnd machen ain wonung bey jm.



Auß dem volgt vnwidersprechlich / Das der hailig gayst  
nichts offenbaren mag / wider die leere Chusti / oder wöliches  
in der leer Chusti / sampt anderer hailigen geschrifft / nit war  
hafftiglich begryffen ist / wie auch die Apostel / auß offenba  
rung des hailigen gaysts / nun geleert / was sy von Christo ge  
hört haben / vñ das vergessen war / widerumb durch den hay  
ligen gayst (wie Christus verhayssen hett) gelernet haben /  
sampt aller geschrifft der Propheten / vnd auß dem hailigen  
gayst geredt haben / vnd von Christo weyßgesagt / vñnd das  
sy erfüllt weren / in Christo / erkendt.

Die 5. volg

2. Petri. 1.

Also merck't yederman / wie gar kain nutz / der Sophisten  
bewerung ist / das sy zü zierd / oder besserung des taußs / vnd  
des Testaments Christi / auß irem nârlischen gütduncken / et  
was hinzü thûn / dardurch sy Got vnd Christum Jesum am  
höchsten geschmecht / vnd on wissend veracht haben / Gott  
wöll sy noch erleuchten mit seinem wort / das sy blind / die an  
deren nit verblenden / sonder Christo dem waren liecht nach  
uolgen / Amen.

Doch sagen ire aygne Doctores / ober den maister von syna  
nen / im vierdten büch / Das alle die / wöliche die Cerimonien /  
weytter weñ wasser vom schlechten Element / vnd die wort  
(wie Christus auffgesetzt hat) hinzü thûnd / als nordürfftig  
(gleich sam der tauß sunst nit gerecht vnd genügsam were)  
die selbigen sünden tödlich / dann sy sünden wider den auff  
setzer / vnd das ist war / Ist auch im / als der ewigē vngemeß  
ne weyßhait / die aller gröste schmach / der zerstölichen vnd  
kainnützen menschen duncken / ettwas zierlichers wöllen hyn  
zü thûn / wie oben gemelt. Darumb solt man solchen freuel / in  
der Chustlichen gemain / nit leyden / der hailigen geschrifft /  
vnd den ersten warhaiten (die Gott / vnd ain ainig ewig göe  
lich wesen selber seind) zü vnleyblichem nachtayl. Aber gott  
erbarmt / man wills für ain Christlich ding beschirmen / wie  
dann die bestympten Doctores / am gemelten ortt (zü erheben  
den Bapstlichen gewalt zü erhalten) vnderstanden haben.

Darumb sagen sy also / wie wol sy nit nort seynd (zü rechte

fortigen den tauff) so sünde doch ainer tödtlich/der sy freu-  
lich/oder auß verachtig vnderwegen laß / Das kumpt aber  
auß vnwissenhait der ersten warhaiten/vnd auß zu vil ach-  
tung der gaystlichen Prelaten / weyl sy doch kein Sacrament  
(das krefftig sey) auffsetzen mügen/ noch mynder das Chri-  
stus von jm selber auffgesetzt hatt/ verändern / wie oben be-  
wert/weyl zu der ewigen güthait/vnd der vuentliche weyß-  
hait / nichts bessers / oder zierlichers gethon werden mag.  
Was nun in der hailigen geschafft kein grundt hat/vnd dar-  
zu Got schmechlich ist/zimpt sich (Christo zu preys) veracht  
werden/ Ja gar (als ain irthumb) zu verdamen. Auch mag  
kein mensch zu ainer eodesünd verbinden/ wie ire leerer selber  
sagen/sonderlich Scotus/ am dritten büch schier am end.

So sy dan (wie gehört) selber sagen/das solche Cerimonie  
nit nott seind/ Ja das man nit glauben soll/das sy nott/oder  
nuz seyen zu tauff. Volgt als bald/das sy auch nit nuz seind  
zur gnad. Dan gott thut nichts vergeblich/ sonder vmb seyn  
selbs willen/hatt er alle ding gemacht/vnd vergeblich dient  
man jm mit menschen sagunge/ Volgt das ainer/der in den  
Sacramenten (die Christus selber auffgesetzt hat) mensche-  
liche sagunge haltet/der thut nit ain werck des waren glau-  
bens/sonder der sünde (Dan alles was nit auß dem glauben  
ist/das ist sünd/zun Römern am. 14.) Dann Gott soll allen  
Creaturen für gesetzt werden.

Seind sy dan nit not/ so seind sy wider Gott/noch nutz-  
leer et man Gott vergeblich darmit/vnd nit mit dem hertzen/  
das Got verwirfft an obgemelte orten. Volgt vnwidersprech-  
lich/das sollich geprenge/ nichts anders denn ain stinckende  
hoffart ist/Gott alle zeyt widerwertig/vnd wölcher das ge-  
prenge oder hofflichkeit (nit genügig an der auffsetzung Chri-  
sti/vnd geprauch der Apostel) haben will/oder sein kinder al-  
so tauffen lassen/als ob es etwas besser were/denn Christus/  
vnd seyn Apostel geprauchte haben/der ist von Got verflucht  
vnd als ain vnglaubiger verdampt/weyl er nit recht glaubt

Prover. 16  
Esaie. 29.  
Matth. 15.

Johan. 3.

in den namen des eingebornen sun Gottes Johan. 3. Also ist



gnüg/ auß vor gesetzten Euangelischen texten/ vnd auß den  
ersten warhatten (wölche Got wesentlich seind) bewert/ Das  
zu tauff nit mer not ist/ den Elementlich wasser/ vñ die form  
der wort die Christus sein Apostel geleert hat/ **Matth. vlc. vñ**  
wölcher mer darzu (als not vnd nutz/ oder zierlich) habz will  
der tritt schwerlich/ vnd verschmecht Christi/ der aller vnser  
nutz/ zierde/ vnd gewynn ist/ vnd wir all ainer in jm. Dem al  
lein preys vñ lob/ sey mit dem vatter/ vnd dem hailigē gayst  
in welt zu welt Amen.

**Matth. vlc**

## Nun von der vnderschyd

des Tauffs Johannis vnd Christi/ Etlich an  
der irthumb auch auß zu reytten.

**A**uß obgemelter geschriffte (Johannis am 1. vnd 3. vnd  
Matth. am 3.) ist offenbar/ wie ain so grosse vnder  
schid der tauff Christi/ vnd die tauff Johannis haben/ weyl  
(durch die eusserliche wäschunge sy manende) Johannes als  
ain im wasser getaufft hatt/ das sy sich besserten/ Darumb  
haysst er der Tauff der büß Wirkung/ vñnd gab sunst kein  
gnade/ Sonder bedeutet den zukünfftigen tauff Christi/ das  
er offenbar word/ in Israhel. Johannis. 1. Matth. 3. vnd  
Luce am 3. bezeuget Johannes/ Ich tauff euch in dem was  
ser/ zu der besserung/ vñnd der/ wölcher nach mir zukünfftig  
ist (wölches ich nit würdig bin/ das ich trag seyn schlich) Er  
wirdt euch tauffen im hailigen gayst/ vnd im sewer. Auch  
hatt Johannes/ die form/ wölche Christus auffgesetzt hatt/  
(Matth. am letzten) nit gebrauchet/ sonder also gesagt/ wir  
künd büß/ oder bessert euch/ dan es nahet sich das Reich der  
hymel ic.

**Matth. vlc**

Vnd also ist das die Erst vnderschyd/ zwischen dem tauff  
den Christus auffgesetzt hatt/ mit verhayssung des ewigen  
reyschs Johannis am 3. vnd Marci am letzten. Vnd zwische Johan. 3.  
dem tauff den Johannes gebrauchet hatt/ zu vermanung der Marci vlc

besserung/ in bezeugung das Christus hinnehmen wurde/ die  
**Johan. 1.** Sünde der welt Johannis. 1. Sehet das lamb Gottes/ wölchs  
hin nympt der welt sünd. Vnd sage weyter/ Ich tauff allain  
im wasser / Er ist aber mitten vnder euch gestanden / den je  
mit wißt ic. Das er aber offenbar wurde/ in Israel/ darumb  
hinich kömen im wasser zu tauffen/ vnd Johannes gab zeüg  
knuß von jm ic. Wie oben im text gesagt ist.

**Die Ander** Darinn ist auch die Ander vnderseyd vermeynt vber die  
**vndseyd.** bedeutung/ vnd form/ Das Christus in seyn tauff/ den heyl  
**Matth. 3.** gen gayst/ vnd das sewer/ der lieben gibts/ vñ das ist im sewer  
**Luce. 3.** tauffen. Vnd Luce. 12. Ich bin kommen zu senden das sewer  
**Luce. 12.** aufferden/ vñ was will ich anders/ den das es anzündt werd  
vnd bunn/ Das ist also vil/ Christus durch sein krafft/ vñnd  
verdienst seyns leydens vñnd sterbens (im tauff wirkende)  
macht den menschen geschickt / zu der lieben Gottes / durch  
den eingossnen glaubē/ vñnd zu der liebe des nächsten / wie ain  
glyd dem andern schuldig ist/ zu thun. 1. Corinth. 12. Diß gab  
mit der tauff Johannis/ vñnd hatt auch kein verhayßung/ als  
dieser tauff Christi hatt.

**Johan. 6.** Vnd die Junger Johannis taufften in seyn person/ oder  
**Johan. 3.** in seinem namen / vñnd Christus taufft nitt in aygner person/  
sonder seyn Junder in seinem namen Johannis. 4. Wie woler ge  
taufft haben gemelt wirdt Joannis. 3. als denn im text oben  
gesetzt clar ist/ Nichts bestermynder/ hayße es der tauff Chri  
sti/ wie woler durch sein diener geschickt / inn seiner person.  
Aber Christus wirckt zum außern zaychen/ des dieners (zum  
eufferlichen wäschen/ sampt den gesprochen worten) durch  
den heiligen gayst/ gnad vñnd liebe (auß krafft seynes leydens  
vñnd sterbens) wölche nitt gebunden ist/ an des wäschen im  
wasser/ sonder wirckt wa Gott will/ an Jungen vñnd Alten/  
Juden vñnd Hayden/ on ansehung der person/ dan es ist kein  
ansehen der Person bey Gott.

**Roma. 2.** Also laut es alles an dem gerechten barmherzigen/ vnent  
**Ephesi. 6.** lichen/ gualtigen/ weysen/ warhafftigen/ vñnd gütten willen  
**Colloff. 3.** Gottes/ wem er die yezgemelten gnad geben wöll/ das er im  
**1. Petri. 1.** angeseh/ oder wolgeföllig sey/ als ain glyd Christi geschickt  
**Acto. 10.**



zum reich Gottes/ ja auch ain kind Gottes werd/ durch den glauben vnd widergeburte.

Auß wölcher gemelter vndercheid (kündet auß dem oben gesetzten Euangelischen text) volgt/ Das die irren/ wölche den tauff Christi/ sampt seiner verhayssung/ nitt mer wölle gelten lassen/ wenn den tauff Johannis/ Geursacht durch die wort Pauli/ Ephe. 4. Ain glaub/ ain tauff. Antwort/ Die wort Pauli seind war/ sy bewerren aber nit/ das der tauff Johannis/ vnd der tauff Christi/ gleych/ oder ainer seyen/ sonder mer das Christus mit seym tauff/ den tauff Johannis vertriben vnd geendet hab/ das nun nit mer/ dan ain ainiger tauff Christi sey/ gleych wie durch sein beschneydung/ die ander beschneydung (Abraham zum zaychen geben) hingelegt worden ist/ vnd ain ander zaychen (zu erfüllen Gottes verhayssunge) auffgesetzt/ Nemlich wäschen im Elementischē wasser/ In dem namen des vaters/ vnd des suns/ vnd des hailigē gaysts wölchem der tauff Johannis vorgangen/ vnd als ain figur gewesen ist/ wie obgemelt. So nun die warhait kumen war/ hört die figur billich auff. Aber die krafft ist nitt im wasser/ sonder im wort Gottes Ephe. 5.

Vnd die wäschung im wasser/ ist nun ain bedeutung/ der selbigen Göttlichen krafft/ wäschende die seel von sünden/ das der mensch glaubt in Jesu Christo/ vnd sich auß demütigkeit vnderwerfft/ dem Element des wassers/ dz minder edel ist/ wenn er/ weyl Adam vñ Eua/ wolte Gott gleich sein/ wissend guts vñ böß/ vnd daß erfordert/ die ewige gerechtigkeit/ soll der mensch/ wider erhöcht werde/ nach der verhayssung Christi sprechend/ Ain yeglicher d sich erhöcht/ wirt ernydert/ vñ wer sich nidert/ d wirt erhöcht werde Also werde wir im tauff mit Christo vergraben/ dz wir auch wider auß mit im auffstecken am jungsten tag. Wie bald hernach bewert wirdt.

So dann die krafft des hayls/ nit im wasser ist/ vnd alles an dem gütigen barmherzigen willen Gottes leyet/ im verdienst des leydens Christi/ Volgt zum andern/ Der urchumb/ das man die kinder nit Jungtauffen soll/ biß zum bruch der vernunft/ geursacht auß den wortē Christi Marci am leste

Die a volg

Marci vlt

Wöllicher glaubt vnd taufft wirt / der wirdt selig. Auß dem  
sagen sy / die kinder künden noch nicht glauben / Darumb soll  
man sy auch nicht tauffen. Antwort / So sy sagen / die kinder  
künden noch den glauben nit bekennen / wer wol etwas / Aber  
Christus hatt nit geredt / wer den glauben bekennet / Sonder  
wer glaubt. Nun ist glauben ain innerlich werck der seelen /  
vnd wirdt von Gott allain geben / Darumb ist es ain anders /  
vernunfft haben / vnd vernunfft brauchen / Den glauben ha-  
ben / vnd den glauben bekennen / dan die alten brauchen auch  
nit allweg vernunfft / als die gebornen narren thünd / So mü-  
ssen sy nymmer getaufft werden.

Nun ain Kind erst geboren / hatt also ain vernünfftigen  
seel (wölcher die innerlichen werck zugehört / als gläubet) /  
wie der aller eltest mensch / Aber nit den eusserliche gebrauch  
an wölchem nichts leyt nordürfftig zur gnad / dann er thut  
nichts dartzu / das Gott den glauben ein gyeß / So kan ye ain  
mensch den glauben von aussen nit bekennen inn Christum  
Ihesum / er hab in dann vor im hertzen / von Gott geben / zum

Roma. 10.

Römern am. 10. Mit dem hertzen glaubt man zur gerech-  
tigkeit / oder frümkeit / aber mit dem mund geschicht die ver-  
hehung zum hayl. Vnd Math. am. 16. sprach Christus zu Pe-  
tro / blut vnd flaysch hat dir nit geoffenbart / Sonder mein

Math. 16.

hymelischer vatter / vnd Johannis am. 6. Nyemandt kumpt  
zu mir / mein vatter der mich gesandt hatt / zuech in dann.

Johan. 6.

Nun ist zuehen / vnd offbaren Gottes / ain ding / Denn zu  
Christo kumpt man allain durch den glauben Johannis. 6.

Alles das mir der vatter gybt / das kumpt zu mir / vnd was  
zu mir kumpt / wirff ich nit hinauß / Vnd das ist der will seyn-  
des vatters (den er zu thun kömen ist) das wer den sin sieht /

Johan. 6.

vnd glaubt an in / hab das ewig leben / vnd das ist ain werck  
Gottes / das jr an den glaubent / den er hat gesandt / Sprach  
Jesus zu dem volck etc.

Diaweyl es nun alles an dem gütten vnd barmhertigen  
willen Gottes / vnd an seynen wirckung stat / vnd ain erst ge-  
boren / oder newgeborn Kindlein / der güthait Gottes / vnd



des glaubens/in seynen seel/ also entpfenglich ist/ als ain al-  
ter mensch/ vnd die gütthait/ gwalt/ weyßhait Gottes/ vnd  
die warhait/ vngemessen/ vnd ewig ist / Ja die vngemessene  
hait/ vnd die ewige weyßhait vnd warhait selber. Wöllicher  
wolt dann freuelich sagen/ das Gott ainem kindlein/ die wie-  
dergeburt/ gleych als wol wie ainē alten menschen/ mit wol-  
vergünnen/ im die erbsünd nit weyter zu achtend/ vnd durch  
die krafft/ des verdienstes des leydens/ vnnb sterbens Christi/  
seyn bildennuß/ begnaden das sy im wolgesiel/ weyl das wort  
der widergeberung/ sampt den Worten/ von Christo verord-  
net/ an im gehalten wird / Darzu haben wir vil geschribt/  
von der krafft des tauffs/ wie bald hernach volgen wirdt.

Wenn aber vernunfft etwas hilff zum glauben/ oder zu  
wolgefallen der gnad/ so findt man vil Heyden/ vnd Juden/  
wölche vil schöpffer vernunfft/ vnd gebrauch der vernunfft  
haben/ dan offte vil Christen. Also müß volgen/ das inen got  
dester schneller / den glauben / vnnb wolgeföllige gnad geb/  
Aber das widerspyl ist war/ dan wa das also wer/ so wer der  
glaub nichts/ weyl er von den dingen ist/ wölche die vernunfft  
nit begreyffen/ oder erzaychen mag. Darumb müß der glaub  
die natürlliche verstendnuß/ vnd die vernunfft/ vnder die füß  
treten/ vnd sy demütigen/ vnd vernichten / vnd also ist der  
glaub nicht anders/ dann ain erhöhung / der verstendnuß/  
vber ire aygne natürlliche/ verstendigkeit/ vnd wa das nit/  
so hilfft sy mer zu sünden/ wenn zu gnaden/ dan sy mag got  
(als das vnentlich ewig güt) nit erkennen/ noch lieben.

Hebr. 11.

Also erstattet vnd erfüllt da Christus (durch den vnent-  
lichen/ vnd vngemessnen verdienst seyns leydens) allen gebre-  
cken/ vnd vnmöglichkeit/ der natur/ vnd nympt das kind an/  
als seyn glyd / die bekennung gang vor oder nach / Darumb  
setzt man dem kind birgen/ das sy es vnderweyßen vnd leeren  
(so sy zu gnügsamem alter kömen) den Christlichen glauben  
bekennen/ vnd andere ding/ die sy Christo (als glyder vnd die-  
ner) schuldig seynd/ vnd dem nächsten/ oder andern mitgly-  
dern. Darumb sollen sich die wol fürsehen/ die kinder auß der

tauffheben/ vnd auch die sy tauffen / was sy schuldig seyn/  
vnd warzū sy getaufft seind/ vnd warinn/ Nemlich im tode  
Christi Galatas. 3.

Wa aber die kinder/ biß zū dem brauch der vernunft/ nit  
soltē getaufft werden/ blyben sy darzwischen (nach ordens  
licher weysß zū reden) glyder des Teuffels/ vnd weren nit gly  
der Christi (weyl sy noch nit wider geboren weren) das doch  
grausam zū reden/ vnd der volkomne erlösung Christi gang  
wider wer / vnn̄d ain anzaygung / ins menschen (der Allen  
halb) ainer grossen vndanckbarkeit/ vnn̄d greuel/ das sy ir  
kinder/ ains sollichen grossen gūts beraubten/ vnd von Chris  
to vor beraytete gnad/ vnd verhayßung / also lieberlich ver  
saumten/ vnd verachteten.

Dieser irthumb steckt auch in etlichen geleerten/ wölch die  
geschrifft nach jr naßweysßhait / vermaynen auch auß zū le  
gen/ vnd wissen nit zū brauchen/ die ersten warhayeten/ die  
Gott selber wesentlich seind / von wöllichen alle geschrifft ist  
vnd sagt/ als da seind gūthait/ vnd vnendlichkeit/ ewigkeit/  
gwalt/ weysßhait/ will/ krafft/ warhait/ vnd gloria/ herlig  
keit/ oder rühm/ vnn̄d wölche geschrifft denen allen/ oder num  
aynem auß denen widerwertig ist / oder also weyt gezogen  
wirdt/ das sy mit der ainem/ nit gleichförmig/ oder ainhe  
lig ist/ die selbig ist falsch/ dann sy mangelt der warhait/ wöl  
che dise principia veraint/ vnn̄d warhafft macht/ darumb sy  
auch die ersten warhaiten genandt werden/ sunst weren sy al  
le nichts/ oder kein nutz/ vnd also nit Gott / Aber kinder von  
Christen menschen geboren/ nit lassen Tauffen/ biß sy zū dem  
brauch der vernunft kommen/ ist denen wider / wie gesagt  
ist.

Dann es beraubt die kinder dierweyl/ des namens vnd des  
verdiensts Christi/ wenn sy hießen noch nit Christen mensch  
en/ vnd weren nit glyder Christi/ wölcher das haupt ist / von  
wölchem/ gnad vnd seligkeit/ in alle glyder fletisset/ des we  
re sy beraubt/ wider die gūthait/ vnd volle barmhertzigkeit  
Gottes ic. Vnd das hieß nit kinder zū Christo bracht (Mat.



thel. 19) Sonder dem Moloch/ oder dem Teuffel geopffert/  
Psal. 105. Da also stat/ vnd sy haben ire Sün vnd Töchter  
geopffert den teufflen/ vnnnd haben vergossen das vnschuldig  
blüt. Da sehen wir/ wie grausam vnd schädlich der irthumb  
ist/ Gott wölle alle irzigen erleuchten/ vnd die sehenden be-  
hütten Amen.

Jeremi. 7

## Nun wollen wir sehen vom

dritten/ das ist von der krafft vnd nutz des Tauffs

wie sant Paulus darnon sagt/ zu beweren

Welich vorgemelten puncten/ vnd

ob etlich ander irthumb

werden auß zu

reyt.

**D**er heylig Paulus zun Römern am sechsten Capittel  
spricht/ Wisset jr nit/ das alle die wir in Ihesum Chri-  
stum getaufft seynd/ die seynd in seynem blüt getaufft/ So  
seind wir ye mit im begraben/ durch die Tauff in dem todt  
Christi/ Auff das gleych wie Christus ist auffstanden von  
den todten/ durch die herligkeit des vatters. Also sollen auch  
wir in ainem neuen leben wandlen. So wir aber sampt im  
gepflantz werden zu gleychait seynes todes/ So werden wir  
auch der auffersteung gleych sein/ weyl wir wissen/ das vn-  
ser aller mensch/ mit im gecreuzigt ist/ auff das da seyre der  
sündlich leyb/ das wir fort meer der sünd nit dienen/ dann  
wer gestorben ist/ der ist gerechtfertiget von den sünden.

Der dritte  
Artickel.  
Roma. 6.

Seyn wir aber mit Christo gestorben/ so glauben wir/ das  
wir auch mit im leben werden/ wissend das Christus auff-  
weckt/ von den todten/ hynfür nit stirbt/ der todt wirdt für-  
hyn vber in nit herischen/ dann das er gestorben ist/ das ist er  
der sünd gestorben/ zu ain mal/ das er aber lebt/ das lebt er  
Got. Also auch jr haltet euch darfür/ das jr der sünde gestou-

ben seyt/ vnd Gott lebt durch Jesum Christum vnsern herren.  
Die erste krafft des tauuffs merck man hie.

So laße nun/ die sünd nit herschen in ewerem sterblichen  
leyb/ gehorsam zu laysten seynen lüsten. Auch begeben nicht  
der sünde ewers glyder/ zu waffen der vngerechtigkait/ son-  
der begeben euch selbs Gott/ als die da auß dem toden leben-  
dig seynd/ vnd ewere glyder Gott/ zu waffen der gerechti-  
gkait/ dann die sünd wird nit herschen künden vber euch/ ny-  
temal/ jr nit seyt vnder dem gesetz/ sonder vnder der gnad.  
Die bringet der tauff/ vnd diß ist die verpflichtung/ vnd dienst-  
barkeit des tauuffs/ die man die kinder vnderweyßen soll.

Hi merck/ das auch die hailigen habē böß lüst im fleisch  
denen sy doch nicht volgen/ dann die gnad gegeben von Got  
durch Christū/ im tauff od sunst/ ist noch in inē. Aber so lang  
die gnad regiert/ bleybt das gewissen frey/ vñ zwingt die sünd  
im fleisch. Aber on die gnad/ regiert die sünd/ vnd das gesetz  
verdampft das gewissen/ biß zum todt/ Also ist auch on den  
tauff/ kein sichere verhayßung des lebens/ wie wol Got seyn  
gnad nit an die eusserliche zaychen/ die man Sacramēt haß  
gebunden hatt/ sonder gibtes wenn er will/ auß barmhertzig-  
kait/ vnd zu Colossern am andern spricht sant Paulus.

In Christo wonet die ganz fülle der Gottheit leylich/ vñ  
jr seyt des selben voll/ Wölcher ist das haupt aller fürstent-  
thumb/ vnd oberkeit/ in wölchem jr auch beschneyt seyt  
mit der beschneydung on hend/ durch ablegung/ des sünd-  
lichen leybs im fleisch/ Nemlich mit der beschneydung. Chri-  
sti/ In dem/ das jr mit im begraben seyt/ durch den tauff/  
in wöllichem jr auch seyt auffgestanden/ durch den glauben/  
den Gott wirckt/ wöllicher in aufferweckt hat/ von den tode-  
ten/ vnd hat euch auch mit im/ lebendig gemache/ da jr tode  
warend in den sünden/ vnd in der vorhandt ewers fleisches/  
vnd hat vns geschenckt alle sünde/ vnd außgetilgt die hand-  
geschrifft/ wider vns/ durch schriftlich satzungen erweyßt/  
wölch vns entgegen war/ vnd hatt sy auß dem mittel thon/  
vnd an das Creutz gehefftet/ vnd hat außgezogen die Fürst



dhumb vnd die gwaeltigen schaw tragen / mit fraydigkait /  
vnd einherbrang auß jnen gemacht / in jm selbs.

Da ist zu mercken / das Eirographum / ist gleych als ain  
denckzedel / wölchen der teuffel wider vns gehebt hat / so lang  
biß das der Götlichen gerechtigkeit / genüg geschehe / vnd  
das mocht nit sein / denn durch Christu / der Got vnd mensch  
war / in flayschlichem leyb. Darumb spricht Paulus / Er hat  
vns alle sünd geschenckt / vnd außgetylt die handschafft /  
vnd an das Creutz gehefft ic. Dardurch des gewissen (als  
gefreyet) erlediget wirdt / Dann nichts ist also hardt / wider  
vns / als vnser aygen gewissen / damit wir / gleych als mit  
aygner handschafft / vber zeygt werden / wann vns das ge-  
satz / die sünd offenbaret / damit wir solliche handschafft ge-  
schriben habē. Aber Christus erlöset vns von solchem / durch  
sein Creutz / vnd martert / oder vberwinde den Teuffel / mit  
samt der sünd / vnd dem todt. Diß aber wirdt vns mit ge-  
taylt in der tauß / da wir mit dem blut Christi / versigelt oder  
verzaychnet werden / vnd das hayße Character / des zaychen  
des lambs.

2poca. 9.

Galat. 3.

Derhalb spricht der Apostel zum Galatern am dritten /  
Also ist das gesetz vnser zuchtmayster gewesen biß auff Chri-  
stum / das wir durch den glauben / rechtfertig / oder frum  
worden. Nun aber so der glaub kommen ist / seind wir nit  
mer vnder dem zuchtmayster / Dann jr seyt alle Gottes Kin-  
der / durch den glauben in Ihesum Christum / Dann wie vil  
erwer getaufft seind / die haben Christum angezogen. Zie ist  
kein Jude / noch Kriech. Zie ist kein Knecht / noch freyer.  
Zie ist kein Man / noch Weyb / denn jr seyt allzumal ainer in  
Christo / Seyt jr aber Christen / so seyt jr auch Abrahams so-  
men / vnd nach der verhayßung erben.

Gala. 3.

Vnd zum Galatern am vierden. Ich sag aber / so lang der  
erb ain kind ist / so ist vnder jm / vnd dem knecht kein vnder-  
schid (ob er wol ain herr ist aller güter) Sonder er ist vnder  
den fürmündern / vnd pflegern / biß auff die bestympten seyt  
vom vatter. Also auch wir / da wir kinder waren / da waren

Gala. 4.

wir gefangen/ vnder den eufferlichen fangungen/ Da aber die  
zeyt erfüllet war / sandte Gott seynen sun / der da geboren ist/  
von ainem weyb/ vnnnd vnder das gesetz gethon / auff das er  
die/ so vnder dem gesetz waren erlöset/ dz wir die kinderschafft  
entpfienngen. Weyl jr dann kinder seyt/ hat Gott gesandt seyn  
nen gayst/ in ewer hertzen/ der schreyt / Ach lieber vatter/ Als  
so ist nun hie kein knecht meer/ Sonder eyttel kinder/ Seynd  
es aber kinder/ so seynds auch erben Gottes durch Christum.

So wir nun solchen eyttel / vnd alle bemelte stück / durch  
den aufferlangen/ vnd in sollich erb/ eingesetzt werden/ vnd  
anheben zu sterben der sünd/ vnd der aufferstehung (auff der  
verhayssund Christi) vergewyßt werden/ wie ain grausame  
boßhait wer es dann/ die Jungen kinder/ solliches güts vnd  
freyhait der glyder Christi/ berauben. Dann was wer es an  
ders/ denn (wie gesagt ist) sy dem Moloch/ ain teuffelischen  
Abgott opffern. Psalm. 105. vnd Hiere. 7.

Vñamen  
des Tauffs  
vnd warin  
sein krafft  
sey.

Mit was namen aber der tauff/ in der hailigen geschriffte  
genendt werd (das wir das end dem anfang gleich beschlies  
sen) Wollen wir fürbaß sehen/ Paulus zum Ephesiern am 5.  
Da er vnder andern also spricht/ Ir mann/ liebet ewere wey  
ber/ wie Christus geliebt hatt die Kirch/ das ist/ die Christ  
lich gemain/ vnd hatt sich selber für sy geben / auff das er sy  
hayliget/ vnd hatt sy gerayniget/ durch das wasser bad/ im  
wort des lebēs/ auff das er jm darstellt ain herliche gemain  
die nitt hab ain flecken/ oder runzel/ oder des ettwas/ sonder  
das sy sey hailig/ vnd vnstreflich. Desigleychen zum Thiron  
am. 3.

Da aber erschyn/ die freündelikeit/ vnnnd lewtseligkeit/  
Gottes vnser haylandes/ nitt vmb der werck willen der ge  
rechtigkeit/ die wir thon haben / Sonder nach seynen barm  
herzigkeit/ macht er vnns selig/ durch das bad der widerge  
burt/ vnd ernewerung des hayligen gaysts / wölchen er auß  
gossen hat/ vber vns reychlich/ durch Ihesum Christum vñ  
sern herren / Auff das wir durch des selben gnad gerechtfere



rigt/erben seind/des ewigen lebens/nach der hoffnung/das  
ist ye gewyßlich war.

Solliche will ich das du treybst/auff das die/so an Gots  
glaubig seynd worden/sich fleysigen in gütten wercken für  
trefflich zu seyn/Solliche ist güt vnd nutz den menschen.

Auß disen zweyen Sprüchen / haben wir gleych als ain  
kurze Summarium / der obgemelten ding / Nemlich / das  
zum tauff nun wasser nott ist / deshalb nendte es Paulus  
ain wasser bad/ vnd ain bad der widergeburt / vnnnd das die  
krafft im wort ist/ Darumb spricht er/ im wortt des lebens/  
vnd das wir im tauff gerayniget werden/vnnnd den hailigen  
gayst empfangen/ vnnnd Gottes gnad erlangen (die der tauff  
Johannis nit gab) vnd erben Gottes / durch Christum alles  
samt/ vnd auß barmherzigkayt vnd nit auß vnserem ver-  
dienst zc. wie in obgemelten texten/begryffen ist/ Merck nun  
eben die wort Pauli/ wie er procediert/ Niemandt mag dir  
baß/oder hüpscher sagen/ vnd gründlicher bewerren.

Von disem wasser bad/haben auch weysgesagt/die hays-  
ligen Propheten/mit dem hailigen gayst erfüllt/vnd sonder-  
lich Ezechielis am 36. spricht Gott der her: / Ich werd ober-  
ench außgießen/ ain rayns oder lauters wasser/vnd jr werdt  
gerayniget werden/von aller ewer vnfauberkait/oder sündz.  
Dises wirdt (aygentliche zu reden) verstanden von dem wä-  
schen im tauff/ da die wort Gottes wircken/die gnad/vnnnd  
Christus durch sein blüt/die seel wäscht/vnd gibt jr den hai-  
ligen gayst/wirckend den waren glauben.

Darumb spricht Esaias am. 12. Ir werdt schepffen was-  
ser von den brunnen des herzen/vnd werdent sprechen am sel-  
ben tag/bekennend dem herzen / vnnnd rüffend an syren na-  
men/verkündent dem volck/seyne erfindungen. Gedend  
das da hoch ist seyn name Singend dem herzen/wenn er hat  
grosse ding gethon/ Verkündiget das dem gangen erdtrych/  
oder auff aller erden/ Grew dich/ vnnnd sag lob/ du wonung/  
Syon/wenn groß ist der hailig/her: Israhel/in mieten deyn  
Das ist die Chyftliche gemain/auff dem berg Syon versam

Ezech. 36.

Esais. 12.

Act. 1. vñ 2

let/da der haylig gayst ist gesandt worden.

**Psalm. 28**

Deßgleychen auch von disem wasser/ an dem 28. Psalm. Die stym des herzen vber die wasser/ Gott der herligkeit hat geredt/ der herz vber vil wasser. Wie auch Genesi/ am buch der schöpfung stadt/ der gayst des herzen schwebet ob den wasseren/ Vnd am. 42. Psalm. Der flyessende bach hat frö-

**Psalm. 86**

lich gemacht/ die statt Gottes/ von wölcher im. 86. Psalm. Zerliche ding seynd von dir gesagt/ du stat Gottes/ Dise stat ist die Christlich gemayn/ wölche durch das wasser bad gerayniget wurde (Wie oben Paulus sagt) vnd auß der vilach schwebt sy in freuden durch den hailigen geyst getröst/ Auß der menschart/ vnd dem leyden vnd virstend Chusti. Darumb volgt hernach im Psalmen/ Ain man ist in jr geboren/ der aller höchste hat sy gebawen.

Also sehen wir/ wie gar ainhelligklich der hailig gayst im Allten vnd Newen Testament redt/ vnd bestetigt die auffsetzung des tauuffs/ durch Chustum Ihesum vnnjern herzen. Das nyemandt etwas da endern/ oder dartzu thun mag/ denn der dem hayligen gayst/ vnd Chusto widerwertig ist/ vnd zerstreuet (als oben bewert ist) vnd ain jollicher ist der Entechrist/ Ja dem Lucifer gleycher/ wen ain waren Christen.

**Jlario**

So nun Christus spricht Mathei am. 11. Das des gesetz/ vnd alle Propheten geweyß sagt haben/ biß auff Johannem vnd alle ding von auffsetzung des tauuffs/ vnd seyner materi vnd form/ also clar/ vnd durch den hailigen gayst/ in der geschrift (oben gemele) außgetruckt/ vnnnd erkläert ist/ vnd die leere Chusti/ dem willen Gottes des vatters/ vnd des hayligen gaysts/ also gar verayniget/ vnd gemess ist/ vnnnd der selbig will/ vnwanckelbar ist/ vnd die hailigen Apostel außem

**Johan. 14  
vnd. 16.**

sprechung des hailigen gaysts/ den volkommelich erkende haben. Volgt der groß mechtig irthumb/ der da sagt/ das die Apostel auß offenbarung des hayligen gaysts/ die form des tauuffs von Chusto auffgesetzt/ Mathei am letzten (tauffet sy in dem namen des vatters/ vnd des suns/ vnd des hailigen

**Matth. vlt**



gaysts) geändert / oder verwandelt haben / vnd nemen vns  
sach auß den geschichten der Apostel / da gemelt wirdt / wie  
sy in dem namen Christi getaufft haben / wie wol es (aygent  
lich zu reden) kein verenderung ist / wenn wa man Gott nese  
da werden allwegen / drey person verstanden / Darumb bes  
dorfft es keiner sonderlichen offenbarung / Doch wollen wir  
den irthumb bass sachen / vnd ir eytelkeit anzaigen.

Aber auß dem / das die Apostel In dem namen Christi ge  
taufft haben / Folgt nit / das sy die form / von Christo gelehrt /  
außgelassen haben / sonder mer / das sy nitt mit aygem taufft  
oder in aygner person / getaufft haben / Sonder inn vnd mit  
dem tauff Christi / vnd nitt Johannis taufft / vnd seyner pers  
son / Dann im taufft / vnd in dem namen / oder in der person  
Christi / tauffen / Ist ain ding / vnd vnderschaydet / vom tauff  
Johannis / in wölchem auch seyn Junger taufften / Dan Jo  
hannis am. 3. stat klarlich / das Ihesus taufft hab / vnd Jo  
hannis am. 4. stat / Wie wol Ihesus nitt tauffet / sonder seyn  
Junger.

Acto. 10.

Johan. 3.

Johan. 4.

So nun im taufft / vnd in der person Christi tauffen / nit  
ain ding wer / so wer die obgemelt geschafft / wider ainander  
Denn er hat getaufft / vnd hat nit getaufft / ist ye wider syns  
vnd vnntuglich / Darumb muß mans durch den gemaynen  
beauch verainigen / Was ainer durch ander thut (die von sey  
nen wegen / oder auß beuelch / in seyner person handeln) das  
würdt er selbs thon haben gesprochen / vnd wer also handelt /  
der thut nitt seyn werck / sonder des geschafft / der jm den be  
uelch geben hatt. Also hatt kein Apostel / in seym aygen taufft  
getaufft / weñ es ist nun ain taufft Christi / Ephe. 4. Darumb  
da ain tayl sprachen / Ich bin Paulisch / der ander / ich bin Ze  
pthisch / der dritt / ich bin Appollisch / der vierde / ich bin Chri  
stisch. Da sprach Paulus / Ist nun Christus in stuck zertaylt /  
oder seyt ir in dem namen Pauli getaufft ic.

Ephe. 4.

1. Corin. 1.

Da zaygt er an / das noch alle menschen im namen Chri  
sti getaufft werden / weyl er keynem diener nicht will lassen  
zu legen / dann allain Christus taufft im hayligen gayst vnd

¶

fewer/ das haben wir auch ain vnkundt / in der Histori Sijt  
da sant Laurentius/ den blinden Lucillu tauffen solte/ sprach  
er zu im/ Begerstu im namen Ihesu Christi/ getaufft zu wer  
den/ vnd er Antwort/ Ich hab lang begert/ Volgt hernach  
vnd er tauffet in In dem namen des vatters / vnd des suns/  
vnd des hailigen gaysts. Also haben auch die Appestel ge  
thon/ alle zeyt haltend die leere ires maysters / vnd wölcher  
noch hevt in dem namē/ oder dem tauff Christi/ nit getaufe  
wirdt/ ist nit ain glyd/ der Christlichen gemain/ wie oben offe  
anzaygt ist.

Da felle der grundtegar nyder/ darmit sy bewerren wöllen/  
das der hailig gayst/ etwas anders/ geoffenbart hab/ denn  
Christus auffgesetzt hat/ vnd das sy iren irthumb/ vñ blinde  
hait/ beschirmen/ wöllen sy die hailigen Appestel/ ungehor  
sam gewesen seyn/ irem mayster Christo/ scheltē oder beschul  
digen/ pfeü der stinckenden hoffart/ vnd der grossen schand/  
den Apostlen zu gemessen/ vnd noch vil mer Götlichem wee  
sen vnd willen / den wanckelbar vnd vnsteet wöllen machen  
Das doch gots verlengnē ist/ vnd hayst/ wie oben durch den  
grundt der ersten warhayten/ gnügsam bewert ist.

Doch mochten die Apostel den namen Ihesum Christum  
wol darzu nemen/ oder genömen haben/ wie sy dann vor dem  
tauff/ allweg leerten/ vnd dem volck Predigten / das Ihesus  
Christus wer warlich der sun Gottes / der haylmacher der  
welt/ der für vns gestorben wer/ vnd am dritten tag auff er  
standen/ vnd wie er (auffgefaren gen hymel) yetz seß zur rech  
ten des vatters ꝛc. Vnd das kein name vnder dem hymel wer  
in dem wir selig wurden/ dann allain der namen Ihesus/ als  
die geschicht der Apostel außweysen/ Actorum am 15. Vom  
anfang an.

Auff das taufften sy denn die/ wölche iren worten glaub  
ten/ in dem tauff Christi (von im auffgesetzt) im namen des  
vatters/ vnd des suns/ vnd des hayligen gaysts/ vnd wa sy



die form nit braucht hetten/ hieß nit im tauff/ oder in der per-  
son Christi getaufft haben/ weyl sy seyn beuelch nit gehalten  
hetten (wie gesagt ist) vnd das ist die form/ wölch die Krie-  
chisch gemayn / noch braucht/ Der / oder die diener Christi/  
werdt/ oder werdent getaufft im namen des vaters ic. Oder  
in prima persona / Ich tauffe dich/ oder euch diener Christi/  
oder euch glaubigen in Ihesum Christum / oder euch glyder  
Christi/ in dem namen des vatters/ vnd des suns/ vnnnd des  
hailigen gaysts/ Vnd das ist recht getaufft/ wie alle Docto-  
res vber den mayster von synnen sagen/ vnd das ist auch auf  
den namen Christi getaufft.

Darumb aber hat man den namen Christi genendt/ vnd  
nit den aygnen namen/ von den menschen auffgesetzt/ oder er  
wölt (als wir nun thünd) Auff das der tauff/ vnd der nam  
Christi gemayn wurden vberal/ Vnd Johannis tauff/ vnnnd  
name abnem/ vnd also ain glaub in Ihesum Christum/ vnd  
ain tauff blyb / zum Ephesiern am. 4. Wie dann Johannes  
vor gesagt hett/ Er muß zu nemen/ vnd ich abnemen. Also ist  
der nam Christi ain gemayner nam worden / aller getauffte  
vnnnd glaubigen/ das sy alle Christen genendt werden / vom  
tauff vnd glauben in Ihesum Christum / das er sey der Sun  
Gottes Johannis. 1.

Ephesi. 4.

Johan. 1.

Deßhalb sant Peter Actuum am. 2. nach solcher Prie-  
dig/ vnd erklerung der hailigen geschriffte/ Da sy in fragten  
was sy thün sollten/ sprach er zum volck / Thut büß/ vnd laß  
sich ain yeglicher tauffen / auff den namen Ihesu Christi/  
zur vergeblig der sünde / so werdent jr entpfahen die gab des  
hayligen gaysts/ Dann ewer vnd ewerer kinder/ ist das ver-  
hayssen/ vnd aller die ferz seind / wölche Gott vnser her/ her  
zu ruffen wirdt ic.

Die nun seyn wort geren an namen / lieffen sich tauffen/  
vnd wurden hünzu thon/ an dem tag bey drey tausent seelen/

Wöllicher wolt nun da sagen/ das Petrus / yeglichem ain  
namen gebē/ oder sy bey iren aygnen namen/ geneit/ her/ son-  
der auff den ainigen namē Christi/ seind sy alle getaufft wor-  
den/ vnnnd mocht also sagen / Werdent getaufft jr Christen/  
oder Christglaubigen alle / Im namen des vatters / vnd des  
suns/ vñ des hailigen gaysts. Amen. Vnd das ist der gemain  
brauch lange zeyt gewesen/ vnnnd noch/ so man die alten/ be-  
kerten tauffen will/ glaubt jr in Ihesum Christum/ das er sey  
der sun Gottes/ auß liebe gesandt in dise welt/ vom vater Jo-  
hannis am. 3. Vnd also alle Artickel des glaubens / die von  
Christo seind/ vnd von der hayligen drey ainigkeit/ vnd das  
hayst wol auff den glauben des namens Christi getaufft/ vñ  
in der person oder im tauff Christi (wie gesagt ist) im sey al-  
lein/ mit dem vatter/ vnd dem hailigen gayst/ lob/ eer/ vnd  
preyß/ in ewigkeit/ Amen. •

Von den  
vntauffte  
Kindern.

¶ Nun wirdt noch ain grosser freuel erfunden/ der offte ge-  
braucht wirdt/ von den kinden/ die on den tauff verschayden  
Vnd hat sich begeben in disem jar/ das ain Pfarrer in einer  
Statt ist auffgestanden/ vnd hat auff offner Cangel gesagt  
die kindlein/ so on den tauff/ des wassers sterben/ die werden  
verdampft (Also das sy des angesichts Gottes/ ewig beraubt  
seyen) geursacht auß dem wort Christi Johannis am. 3. Es  
sey dann / das yemandes widerumb geboren werd/ auß dem  
wasser / vnnnd dem hailigen gayst / so mag er nitt sehen das  
Reych Gottes.

Johan. 3.

Darnach ist der ander Prediger auffgestanden/ vnd hat  
geredt/ diser hab gelogen/ Sy werden nitt verdampft/ sonder  
selig/ geursacht auß den Worten Christi/ Lassent die kindlein  
zu mir kommen/ vnd wöret inen nicht / dann solcher ist das  
Reych Gottes. Wenns nun war wer/ das dise zween bayde  
gesagt haben/ das doch vnmtiglich ist (weyl sy gerad wider  
ainander geredt haben) noch hette jr kayner Euangelisch ge-  
predigt/ wie wol sy bayde Euangelische sprich geprauchet ha-

Math. 19  
Luce. 18.  
Marci. 10



ben/doch auß vnrechtem verstand. Dann der erste hat engst  
hafftige hertzen gemacht/den gotsfürchtigen frawen/denen  
solliche mit kinden begegnet ist/ vnnnd hatt sy also wider die  
Euangelische liebe verletzt/vnd betrübt/ nun das Euange-  
lion wider sich selbs brauchen / mag nymmermer Euanges-  
lisch predigen genandt werden.

Der ander/ hatt die thorechte vnd verwegne Mützen / ge-  
ursacht vnnnd gesterckt / das sy bester vnerschrocklicher / die  
kinder (wölche sy mit schanden entpfangen haben) verder-  
ben/auff das sy mit vor der welt geschendt werden/ als layder  
offt erfahren ist/vnd also hat er sy geschediget/an iren armen  
seelen/wölches doch das Euangelion Christi / gwaltigklich  
strafft/vnd verbaist.

Auff das ist ain Antwort / das sy beyde geirrt haben/  
gleich sam nitt gnügsam / in der hailigen geschuffte erfahren/  
oder gegründt. Dann des Ersten wort/ schliessen gleich als  
ob Got sein gnad vnd barmhertzigkait / an die Sacrament/  
das ist/an die eusserliche zaychen/ gebunden hett/das offens-  
lich wider die hailige geschuffte ist/weyl Gott etlich mensche  
noch in mütter leyb gehailiget hat/ als Hieremia vnd Johan-  
nem den tauffer / vnd etlich glaub (durch die wort der Apo-  
stel) in Ihesum Christum/seind erfüllt worden/mit dem hay-  
ligen gayst/ee dann sy getaufft worden/ Acto: 1. am: 10. Also  
das sy auch redten mit mangelay zungen.

So es nun auß zufallender sacht/ nitt möglich gewesen  
wer/ das die selben glaubigen/getaufft weren worden/wöl-  
cher wolle zweyflen / das sy durch die vnergründelichen/vnd  
vngemeßne gnad/vnd barmhertzigkait Gottes/on den taff-  
 weren selig worden/Weyl geschriben ist/die erden ist voll der  
barmhertzigkait/des herren/Psal. 32. vnd Psal. 118. Vnd  
die barmhertzigkait Gottes/biß in hymel/Psal. 35. vñ 56.  
vnd biß in ewigkait Psal. 105. Vnd dein barmhertzigkait ist  
groß vber mir / Psal. 85. Vnd die barmhertzigkait ist ge-  
gründt/im hymel. Psal. 88.

Antwort  
auff des er-  
sten red.

Hiere. 1.  
Luc. 10.

Ps. 32. 118  
Psa. 35. 56  
Psal. 105.  
Psam. 85.  
Psal. 88

0  
Dergleychen auch vil marterer durch den glauben vnd liebe (inen vñ Gott verlyhen) seind in irem blüt getaufft worden/ wie wol es kein Sacrament ist (als wir gemainlich dar von reden) Dis haben wir auß bewerten Historien/ der Römischen Kayser/ vnd von anderen Tyrannen/ wölliche den Christlichen glauben/ am anfang veruolgt haben/ als Marcentius in Alexandria/ der Katherinam sieng. Liß die Histori so findstu/ das fünffzig maister / in irem blüt getaufft seynd worden/ auff den glauben/ vnd ire standthafftige bekennüg im feuer/ auch Emertiana noch ain Haydin/ auff dem grab Agnetis verstayniget ic.

Das drey-  
erlay tauff  
sey.

Das aber nit yemandt achte/ Ich rede freuelich von mir selbs/ so hörent was ire Doctores sagen/ vber den maister von synnen/ am 4. büch/ in der ersten vnderschyd/ Gott (spräche sy) hatt seyn gnad/ vnd barmhertzigkait/ nit an die Sacrament/ das ist/ an die eusserliche deutzeychen/ gebunden/ Dar umb sprechen sy/ das dreyerlay tauff seyen/ mit namen/ fluminis/ fluminis/ vnd sanguinis/ das ist/ der gnaden/ des wassers vnd des blüts.

Vom tauff  
des flamm-  
en.

Nun ist allain der tauff des wassers (von wölchem Christus sagt Johannis. 3.) ain Sacrament/ das ist/ ain zeychen bedeutend/ die innerliche wäschung der seelen/ so die wort (vñ Christo auffgesetzt) zu der eusserlichen wäschung (wie oben gemelt ist) gesprochen werden / Weyl aber die innerlich wäschung der seel von sünden/ der zu achtung oder des myßfals halb/ frey/ in dem barmhertzigen/ willen Gottes stadt/ mag er die selben gnad geben wem er will / on alle eusserliche bedeutung/ vnd das nendt man den tauff des flammen/ der binnenden lieben halber/ die dem gnadreychen glaubē anhangē Also sprach Johannes der tauffer/ Er wirdt euch tauffen im hailigen gayst/ vnd im feuer/ wie oben gemelt ist.

Aber solche gnad/ wirdt dem menschen auß grundtloßer barmhertzigkait Gottes/ on allen verdienst/ oder entgeltuß der schuld/ Dann die vngemeßne / vnd vnentliche barmhertzigkait/ bedarff keins verdienstes/ noch menschlicher werck/



wenn jr ist kein verdienst/ oder werck gemess gnug/ vnd kein schuld/ oder sünd/ zu groß/ sunst verlut sy jren waren rechten namen/ vnd sy tilgt auch alle sünde ab oder auß/ weyl jr gnug thun der vnentliche gerechtigkeit Gottes/ dem willen Gottes vergleycht wirdt/ durch den verdienst Christi/ der vns vater/ darumb geben ist/ auff das er volend oder erfüll/ das wir nit vermügen.

Da hat man/ was h̄r der erst tauff kumpt/ das ist gnad/ glaub/ vnd fryd mit Gott/ vnd der gwissen/ die Gott yederman nach seym willen gybt/ vnd nit nach geschicklichkeit der natur/ sonder auß Götlicher barmherzigkeit/ als gaben Gottes/ zu vnserm hayl/ vnd raynigung/ Ephesi. 2. Wann auß gnaden seyt jr behalten/ durch den glauben/ vnd das nit auß euch selbs. Es ist ain gab Gottes/ nit auß den wercken/ das sich nicht yemandt rüme/ dan wir seind sein werck/ geschaffen/ durch Ihesum Christum/ zu gütten wercken/ zu wölche vns Gott zuvor berayt hatt/ das wir darinnen wandlen sollen.

Ephesi. 2.

Vnd vor disen worten im selben Capittel spricht er also/ Aber gott der da reych ist/ von barmherzigkeit/ durch seyne grosse liebe/ damit er vns geliebet hat/ da wir todt waren/ in den sünden/ hatt er vns sampt Christo/ lebendig gemacht/ (dann auß gnad seyt jr selig worden) vnd hat vns sampt jm aufferweckt/ vnd sampt jm gesetzt in das hymlich wesen/ durch Ihesum Christum/ auff das er erzaygte/ in den zukünftigen zeyten/ den vberschwenglichen reychthumb/ seiner gnade/ mit seynet freündlichkeit vber vns/ durch Ihesum Christum/ Vnd Actorum am. 15. Sprach Petrus zu den bekerten Jyden/ Gott hat nit vnderchyde gemacht/ zwyschen jnen/ vnd vns/ durch den glauben raynigende/ jre sünde.

Ephesi. 2.

So nun/ die barmherzigkeit/ mit sampt den obgemelten warhaiten/ vnentlich/ vnd vngemessen ist/ vñ allain auß vñ mit dem willen Gottes (gleych mit jnen vnentlich) verstreckt

Argumentum.

vnd erfüllt wirdt. Folgt auß dem/ Das sy sich auß strecken  
 vber Jung vnd alt/ vber Hayden vnd Juden/ Als wir haben  
 Job per to vom Job/ vnd Acto. 10. vom Cornelio/ Desgleichen vom  
 cum. Eunuch/ der künigin von Candia/ den Philipps auff dem  
 Acto. 10. wagen vnderichtet / auß gehayß des Engels/ vnd lauffet  
 in/ Acto. 8. Vnd ist nyemandes der sich verbergen müß/ vor  
 psalm. 18. seyner hyze. psalm. 18.

Deshalb ist es ain grosser frevel/ mütwill/ vnd ain merck-  
 licher irthumb/ das ainer (er sey ioch wie geleert er wöll) für  
 ain warhait zu sagen sich vermist/ das menschē kinder/ oder  
 außh allt lewt (wölchen der Christlich glaub noch nit vera-  
 kündt ist) verdampft/ oder nit verdampft werden/ weyl sol-  
 lichts alles/ in dem haimlichen/ vnerforschlichen vitsyl vnd  
 willen Gottes steet.

Roma. 12. Darumb sant Paulus zum Römern am. 12. spricht. Ir solt  
 nit mer wöllen wissen/ wenn not ist zu wissen / Er hat auch  
 von sollichen künden nicht geschriben/ der geleychen auch die  
 anderen Apostel/ nye nichts darvon gefragt/ Nemlich/ von  
 den Gotteuerborgē dingen / Sonder von den haimlichaiten  
 Gottes/ spricht Paulus/ O wölch ain tyeffe des reychentums  
 Roma. 11. bayde/ der weyßhait/ vñ der erkennnis Gottes/ wie gar vn-  
 begreifflich seind seyne gericht/ vnd vnerforschliche seyne weg.  
 1. Cor. 40. Dann wer hat des herren synn erkendt/ vnd wer ist sein rat-  
 geb gewesen/ wer hatt jm ettwas zu vor geben/ das jm wird  
 wider vergolten/ dan von jm/ vnd durch jm/ vnd zu jm seind  
 alle ding/ Im sey preys in ewigkait/ Amen.

Der vrsach halben/ solten die obgemelten Prediger/ vor-  
 gelernet haben/ was man auff der Cangel reden sollt/ vnd  
 nit also groß auffrär / vnd ergermus im volck gemacht habē  
 vnd zutracht erweckt (Gott dem allmechtigen also freu-  
 lich in seyne gericht greiffende) zu mercklichem schaden des  
 ainfeltigen volcks (wie obgemele) vnd werdē deshalb gleich-  
 irzig gestrafft/ weyl sy baydenit Euangelisch gepredigt/ vñ  
 wol Euangelisch spruch gefürt haben. Dañ der ander/ mag



eben als wenig beweysen/ das Christus von den nit getauff- Math. 19.  
ten kindern geredt hab/ als wenig der erst beweren mag/ das Luce. 18.  
Gott seyn gnad/ an die eusserlichen Sacrament/ das ist bes Marci. 10  
dent zaychen gebunden hab 2c.

Solches zu beweysen/ wollen wir die genannten Euanges Antwort  
listen sehen/ Zum ersten Mattheum am. 19. Da er von dem auf des an  
Edlichen/ vnd auch Jungfräwlichen stand/ geredt het/ dar deren red.  
nach sagt er/ Da wurden Kindlein zu jm bracht/ das er die Math. 19.  
hend auff sy leget/ vnd bettet/ die Junger aber schnauten sy  
an/ Aber Ihesus sprach/ Laßt die kindlein/ vnd wöret jnen  
nit zu mir zu kommen/ dann solcher ist das hymelreich/ vnd  
er leget die hend auff sy/ vnd zoch darvon.

Aber Marcus spricht/ Vnd sy brachten kinder zu jm/ das Marci. 10  
er sy anrühret/ die Junger aber führen sy an/ die sy trügen/ Da  
es aber Ihesus sahe/ ward er unwillig/ vnd sprach zu jnen/  
Lassend die kindlein zu mir kōmen/ vnd wöret in nicht/ dann  
solcher ist das reich Gottes/ Warlich sag ich euch/ wer nitt  
entpfahet das reich Gottes/ als ain kindlein/ der wirdt nitt  
hymel kommen/ vnd er umbfieng sy/ vnd leget die hend auff  
sy/ vnd segnet sy 2c. Lucas sagt wie Mathens/ dann das er  
spricht/ Ihesus aber rühret sy zu jni 2c. Luce. 18.

Diser text zaygent an/ das dise kinder/ nit getaufft weren  
oder das sy on dent auff/ das Reich der hymel haben wur-  
den/ Sonder zaygt die andacht/ vnd begyrde/ der alten/ das  
jre kinder von Christo gehailiget wurden/ durch aufflegung  
seiner hend/ dann alle die seyn hend rührten/ wurden haylig  
von jnen/ vnd gesunde von aussen/ vnd das er für sy bettet/  
Dann was er sein vatter batt/ vnd für wölche/ das ward er  
erhöht/ das sy auch an der seel rayn wurde/ vnd das was jnen  
wol ain haylsamer tauff/ weyl es jm also wol gefiel/ wie wol  
die Junger vermaynten/ es wer vmb sunst/ so sy seyn leere vñ  
wort/ nit behalten vnd begreyffen mochten/ darumb schnau-  
ten sy die an/ die sy trügen. Das sy villencht die andern nitt  
hynderten/ an der Predig/ oder das jnen villencht im getren-  
nit schaden geschehe.

Christus aber zaygt hie an/ das sein gütte gnad / vnd ongeente barmherzigkait (wie gemelt) nyemandt fürgieng/ sonder sich in Jung vnd Alt (on ansehung der person) außsetzlet/ Darumb verbeisttet er vnd will / das nyemandts gehindert werd/ zu jm zu kommen/ das ist/ sein glyd zu werden/ So er spricht/ Lassent die Kinder/ vnd wöret inen nicht/ zu mir zu kommen / Das dann im tauß/ oder durch den tauß/ vnd den glauben geschicht/ wie oben auß Paulo bewert/ vnd angezaygt ist/ Wenn das reych der hymel ist jr/ wölchs doch og gnad nit geben oder erlangt wirdt.

Der vsach halben/ wirdt auß disem text mer bewert/ das man die Jungen Kinder/ nit hindern soll/ durch den tauß glyd der Christi zu werden (ob sy wol sein wortt noch nit hallten/ ober bekennen künden) wenn das sy on den tauß des wassers selig werden/ wie die Götlich barmherzigkait/ in der letzten nott / nyemandts erseeren will / vnd zu vnmüßigkait nyemandt zwingt / sonder ersetzt mit gnaden / den gebrechen der natur / oder der Creatur / so er darumb gebetten wirdt / im dem namen Christi/ Johannis am vierzehenden / vnd am sechzehenden.

Johan. 14  
vnd 16.

Wie man  
sich halten  
soll in nö-  
then.

Darumb ist diß der aller sicherest radt / Das man in sorgen der geburt/ so man den abgang/ des Kindes/ vermerckt/ Gott den hymlichen vatter / vmb Christus willen anruff/ das er durch den verdienst Christi / vnd durch sein barmherzigkait/ mit seynere gnad erfüllen / oder ersetzen wöll/ das die schwach natur der mütter vnd des Kindes nit vermag / vnd es nit seym wolgefallen fürkomme in mütterleyb / wie Johanne dem täuffer/ vnd annder die er gehailiget hatt/ vnd auch die er in irem aygnen blüt getaufft hatt / von wölchen oben gesagt ist. Denn so biß ungezweyffelt/ nach der verhaysung Christi/ Gott der barmherzig vatter/ werd die andechtigen herten erhören/ vnd das kind/ als ain glyd Christi seins geliebten suns annemen / Wölchem allain danc/ lob/ vnd preys sey in ewigkait/ Amen.

Auß disen dingen / volgt die thorhait vnd der freuel diser



Prediger/ auß vnrechtem verstand / der Euangelischen geschafft/ das sy Gott vnd Christo/ also in seyn gericht gegryffen haben. Ist auch klar vnd offenbar/ das Christus mit dieser geschafft/ nit zetigknuß hat geben/ das die vngetaufften Kinder selig werden/ sonder mer das sy so bald müglich ist/ in seynem namen sollen getaufft werden. Da er spricht/ laßt sy zu mir kommen/ Darumb spricht Marcus/ Er vmb fieng sy/ vnnnd leget die hand auff sy / vnd segnet sy/ Wölche alles zaychen der annemang/ der liebe/ vnd der gnadenreichen einleybung/ vnnnd beseligung seind. Darumb als bald geboren/ also bald sollen sy wider geboren werden/ im wasser/ vnd im dem hailigen gayst/ wölchen Christus durch seyn wort gybt/ nach dem oben bewert ist/ in dem text. Im sey lob/danck/vñ preys/ mit dem vatter/ vnd dem hailigen gayst in ewigkait. Amen.

Disen kurtzen begryff/ von dem Christlichen tauff/ hab ich also auß den ersten warhayten ( am anfang bestympt ) die Gott selber seind/ vnd auß der hayligen Euangelischen/ vnd Appestolischen/ mitsampt Prophetischer geschrifft zusamen gesetzt/ das alle Christglaubigen menschen/ ermessen vnd erkennen möchten/ wie ferz wir auß vnnützem hoffertigem geprenge/ oder solemnitet/ von der rechten vnd schlechten warhait/ vnd von dem willen Gottes/ sampt der auffsatzig Christi/ abgeführt/ vnd verhindert seynd / vnd auß vnserm aygen fürnemen vnd güteduncken/ Gott zu eeren vermaynt/ vnd in doch am höchsten geschmecht haben / vnnnd haben doch vil darwider geschrieben/ aber den baum nit bey der rechten wurzel angryffen / damit die myßbreuch vnnnd irthumb blyben seynd.

Auch das man ( wie gemelt ist ) zu Christlichem tauff nicht nordürfftig ist/ dann allain Elementisch wasser/ vnd der wort/ von Christo bestympt/ Mathei am letzten. An wölchen denn die innerlich wäschung/ vnd krafft des tauffs leyet Auß dem barmherzigen willen Gottes/ im verdienst des leydens/ vnd sterbens Christi / in wöllichem wir anheben zu

Matth. vlt

sterben der sünd/in Christo vergraben/ das vns die erbsünd/  
nit zu geacht wirdt/vnd auch/also lang wir in der verpflicht  
tung des Christlichen taufts bleyben/ kein ander sünd/ weyl  
wir vns nit vnwürdig machen des Christlichen namens/mit  
seym blut versigelt. Aber wir all mögen den alten Adam/ nit  
ganz tödten/oder demmen/das er nit zu zeyten auffstand/  
wider Christum/vnd vns zu streyten/bis an das ende dises  
lebens/vnd so wir (Gott bittende) dritterlichen streyten wer  
den/wirdt vns die sünd/die in vns ist/ nit zu geacht/ als ob  
sy Got myßföllig/vnd vns verdamlich wer/sonder Christus  
außseyner krafft wirdt vns vberwindung geben. 1. Corin. 15.  
Aber Got sey danck/der vns hat vberwindung geben/durch  
Ihesum Christum vnsern herren/ Amen.

1. Corin. 15

Was die  
beste zierd  
des taufts  
ist.

Vnd die größte zierde/die Gott zum tauft haben will/ ist  
die diemütigkeit/ das sich die menschen diemütigen/vnd er  
das Element (auß erforderung Göttlicher gerechtigkeit)  
wölche sich auß hoffart/ vber Gott (in Adam) erhöcht ha  
ben/vnd diß geschlecht gebrenzt/ gefelle Gott wol / vnnnd ist  
entpfenglich der gnade Gottes / vnd sunst nicht/ das von  
den menschen erdacht ist / es sey wie gleyssend / vnd schön es  
joch wöll/vnd vor den menschen scheinde/ vnd das ist nit al  
lein vntüglich zum tauft/sonder auch Gott vnd Christo/der  
ewigen weyßhait schmechlich/dem willen Gottes widerwer  
tig/vnd sein gewalt nachtaylig/wie oben genügsam erkläret  
ist. Die irthumme aber/vnd die nütze/des taufts/ werden er  
kende/ durch die obgesetzten schrifftten / darumb ich nit nott  
seyn/acht/weyter darvon zu repetieren zc.

Also bevilich ich disen meinen verstand/vnd schreyben/der  
ewigen vnentliche weyßhait/vnd dem willen Gottes/sampt  
der hailigen geschrifft/ zu richten/vnd erbesit mich willig zu  
volgen/ wa mich ainer bessers (den ersten warhayten/vnnnd  
der hailigen geschrifft/on nachtayl) vnderweyßen mag / bey  
wölchen ich leyb/seel/güt vnd eere lassen will/vnd alles das  
auff diser erden hoch geacht ist/ gleych als kot mit Paulo ver  
achten/das ich Christum gewinnen müß. Bitt auch alle ge



leerten diser zeyt/vmb Christus willen. Das sy auß vermessen  
 haire irer kunst / Gott nit frenelich in seyn haymlich gerichte  
 greysen / vnd iren pomp / der Götlichen ordnung / vnd der  
 auffsetzung Christi nit vergleychen wollen. Auff das in zu  
 gemessen werd / das da geschryben ist / Proverbi. 25. Gleych  
 als ainem nie gut ist / der vil hönig yffet / also auch der ain er-  
 forscher der haymlichen herligkeit Gottes ist / der wirdt ver-  
 stossen von der glori.

Am Buch  
 der spruch

Vnd das sy volgen der leere des Weysen mans / Ecclesia.  
 am buch der gaystlichen zucht. Xemer du groß bist / so demü-  
 tig dich in allen dingen / vnd so wirstu gnad bey Gott fin-  
 den / dann groß ist allain Gots gewalt / vnd von den demü-  
 tigen wirdt er geeret. Frag nit nach dem / das dir zu hoch ist /  
 vnd was dir zu schwer ist / such nit / Tracht darnach was dir  
 Gott gebotten hat allzeyt / vnd vil seiner werck bekümer dich  
 nit / Dann es ist dir nit von nöiten / zu sehen mit deinen augen  
 die verborigne ding / in vnnötigen dingen erforsch nit vil / vnd  
 vil seyner werck bekümer dich nit / dann vil seyner ding seynd  
 vns anzeyt / die vber des menschen verstandt seind / dann  
 deren arckwoon hat ir vil gestürzet / vnd ire synn in der nich-  
 tigkeit / verhindert. Vnd Esa. 4. Wölcher die erforscher der  
 haymlichkeiten macht / als ob sy nit seyn / vund darnach / Es  
 ist kain erforschung seyner weysheit / wöllicher dem müden  
 krafft gybt etc.

Ecclesi. 3.

Esaie. 4.

Auß dem / mitsampt anderen schrifftten volgt / das die  
 menschlich klügheit / nicht zu / oder von den sayzungen Gots  
 thun mag / das vns nutz vñ Gott löblich sey / sonder mer / vns  
 schedlich / vnd Gott schmechlich / wie dann hie vom Christ-  
 lichen tauß gesagt ist worden / weñ Gott widerstade den hof-  
 fertigen / aber den demüthigen gybt er gnad.

Darumb wollen wir Gott bitten mit ganzer begirde vnd  
 züuersicht / das er vns geb / solche demüthigkeit / vnd glauben /  
 das wir vns nit mer vermessen / dann sein wort vermag / vnd  
 will / sonder das wir demüthiglichen im gehorsam seind / das  
 seyn ist erhöhen / vnd alles was vnser ist verachten / gnügig

an seynen ewigen weyßheit ordnung / vnd der heiligen Apo-  
stel anzeygung / das wir mitsampt inen ain gayst / mit Gott  
werden / in ewig schawen vnnnd nyessen als er ist / Wölcher re-  
giert vnd lebt / mitt dem vatter / vnd dem heiligen gayst in  
ewigkait . Amen.

Bitt auch alle Christlich brüder / das sy den barmher-  
zigen vatter / wöllen für mich bitten / mir in seym  
wort standhafftigkeit zu geben / das ich re-  
den müg als sich gebürt . Mit mer den  
gnad vnd fryd / von vnserm her-  
ren Ihesu Christo / sey mit  
ench allen Amen.







